

15
1301
11



門 1 5
號 1301
卷 11

唐文拾遺卷之三十一

榮祿大夫三品頂戴前分巡廣東高廉道加四級臣陸心源輯

李邴

邴咸通中守京兆府參軍長安尉轉監察御史終秘

書郎

唐祕書省祕書郎李君夫人宇文氏墓誌銘序并

夫人姓宇文氏初代武川人太和中遷居洛陽遂為河南人也其先因瑞命氏周紀備詳至於尊爵顯名勳烈赫赫者則史不絕書矣高祖遠感皇任梁王掾曾祖成器皇任絳州翼城縣丞贈禮部員外郎祖邈

昭和十年
二月十四日
購

皇任御史中丞左遷澧州刺史贈太尉父瓚見任右
散騎常侍常侍公娶故太子司議郎博陵崔櫓女夫
人年始十餘歲而崔夫人亡喪禮成人識者異之而
又生稟直氣幼知禮法言必聳尊卑之聽動不假保
傅之訓雍睦兄弟令族罕儔組繡奇工之暇獨掩身
研書偷翫經籍潛學密識人不能探工五言七言詩
詞皆雅正常侍公每賢之爲人曰是女當宜配科名
人咸通甲申歲因丞相今宛陵楊公媒適隴西李柳
任以內事夫人姓鄙華飭而安儉薄時柳守官京兆
府參軍也明年柳改長安尉其夏轉監察御史裏行

充湖南都團練判官又明年勅拜祕書郎其赴職也
攜手同去其拜官也偕行而來又明年春夫人得疾
長安宣平里九十日啓手足而化是歲丁亥夏四月
辛卯享年參拾有壹常侍公哀慟致疾其於追傷痛
惜如掌失明珠耳由三族六姻無不泣涕如雨以其
年八月壬申歸葬長安縣承平鄉龍首原南劉村祔
先塋禮也有子四人女二人長曰召前婺州義烏縣
尉次曰吉前宣州溧水縣尉次曰占授滁州永陽縣
主簿以親喪不之任幼曰同前明經柳執筆追悼因
誌于石銘曰

卷三十一
二
夫人爲女兮既孝且明夫人爲婦兮既順而貞何善則周兮其福不并何松之茂兮而柳之榮無所詰問兮地幽天冥親者泣血兮疏者涕零謹其終始兮而刻斯銘悲哉夫人兮永閱泉扃

石刻

李纓

纓咸通中魏王府參軍

唐魏王府參軍李纓亡妻弘農楊氏夫人墓誌

銘并序

夫人諱蕙字廷秀弘農人也遠祖漢太尉博綜經史著在人間馳聲古今世爲之關西孔子史策有傳曾

祖諱元寂皇任宣州刺史御史大夫贈吏部尚書王父諱申皇任武甯軍節度判官兼殿中侍御史懿行洽聞迥出羣表父鶴前任京兆府三原縣主簿性稟孤標韻含雅操居蓮府傳清廉之譽處縣曹多撫育之仁夫人卽三原君之長女也家傳簪組世襲儒風華族分輝慶門疊耀行著閨闈德比芝蘭辯慧生知天與其性逮歸李氏賢如處家淑德已播於六親孝敬夙彰於九族昭昭婦道肅肅雍和宜爾室家必期榮顯事姑能竭其力無愧於孟光爲婦足見其心何慙於漆室纓家素寒褊官宦且卑物用不自饒所向

皆多闕夫人未常戚戚於顏色孜孜於博求就糲推
甘夫人之道具周矣內外恬和尊卑敬順親戚咸謂
家肥耶夫人女工刀尺悉盡其能至於絲竹多所留
心就中胡琴尤是所善嗚呼痛哉從茲雅音絕矣余
今冬赴調或補一官上以奉旨甘下以資中饋道期
方泰共保榮華何啻福善禍淫天何奪耶邁疾周歲
醫藥無瘳既纏二豎之悲俄及九泉之歎以咸通癸
巳歲九月廿二日以疾終于永甯里之私第享年廿
有九夫人歸我五年祇生一子不福其善早已殞亡
以其年十二月廿三日歸窆于京兆府萬年縣小陽

村耐先塋之側禮也夫人有尸鳩之行慮闕而不書
不若纓自誌其銘曰

疾波東注滔滔不歸雅傳婦德克著母儀事長肅肅
撫幼怡怡夫人既往余將何求

石刻

禹璜

璜安陽縣令

靈泉寺題記

圃人禹璜以咸通八年五月自宗城拜安陽是月十
八日較夏租面寶山之崔嵬稅車半日捫蘿環澗力
扳危峰矚盟津於前眄常山於後左指泰嶽右俯砥

莘流情肆目獨暢其巔雖乘查之間霄漢入壺而觀太虛未必多此十九日紀從者鐵兒阿用十四

明年夏五月廿八日又擢麥租再遊午寺頗息塵思

禹璜記

安陽縣金石錄

朱洪

洪咸通中人

古山索靖廟碑

昔古茹毛飲血尙建神祠土鼓簣桴窪尊坏飲酌元酒以享上帝猶能澤及於民是以必先成民然後致力於神蓋民神之主也自有聚落陬隅人旣安居必

葺祠宇以爲鄉人祈有年之所也是故甸都邱邑必有社稷社稷五祀祭乃有由斯皆德及於民雖沒遐年血食烝盛不敢輕廢今此古山之祠亦其然也按吳王號索靖謚曰文皇帝其姓孫氏諱和吳主大帝權之仲子後漢張伯英之出也伯英書善草隸而有勇力能索鐵甲旣大帝權之崩諸子皆嗣父而立靖獨拂衣別業於吳興居焉有如泰伯三讓之德矣於是訓示民知父子君臣之道時吳蜀分擾決鋒決鏑靖以雄威禦境及子皓立皓感父高邁遂謚索靖文皇帝文謚也謚法曰愛民慈惠曰文今吳興之民共

懷甘棠之詠因請立廟於雪水之南焉今此地亦吳人也古山里人追而祭之迺立廟於古山之隙地咸通十一年夏洪潦大淹堂宇流浪至念當作三年春卽有沈君曰某者更廣其地巍構軒堂沈君思齋記斯事顧乞余言余觀萬化幽元莫能窮究聊具年月日以副來意湖州府志

李藝

藝咸通中人按與全文六百八十二李藝別

唐故潁川郡陳府君墓誌銘 并序

府君諱直其先□州潁川郡人也後乃遷□錢塘縣

而家焉曾祖滔皇試登仕郎新易州易縣尉祖義皇試文林郎愛州九真縣尉考及並遁跡雲林高尚不仕府君卽先考之長子也稟性疏達德惟雅操言不宿諾行不鞫從內已嚴格外已溫恭少小習儒長從詩史鄉黨稱孝親戚稱慈何期積善無徵以咸通五年歲次甲申五月廿一日寢嬰微疾百療不痊終於錢唐縣方興鄉金牛里私第享年六十有九娶譙國郡蔣氏有嗣覆陰早失有子四人長曰存祐娶渤海吳氏有孫一人曰郁郎女孫二人姪娘春娘次曰存議存制娶潁陽范氏存約等幼集儒墨強學爲文每

以仁行理其心常以孝義存其道不以縱口溢其心
 不以繁華飾其體有女四人長女適周氏早歸幽夜
 次女適章氏次女十三娘聞幃友逝鳳舞沈幽小女
 十四娘在室有絡秀之材道蘊之學四德俱備三從
 母儀內睦外和六親謙順各毀不踰禮望丹旒而痛
 心隨孤魂而滴血妹二十五娘適李氏嗟惟庭樹之
 摧長乖鄖萼十八娘適滕氏素質早歸泉扃嗚呼逝
 水難住何新不故既享黃髮之期萬皆盡度乃已元
 龜宅兆卜筮三從以其年八月十八日窆於履泰鄉
 步渚原亦俗里考妣之先塋禮也扶風子寓寄鄰止

得鄉黨之名實謂其往若休炳然斯文用垂於後銘

曰

千秋冥冥松青蕭索山雲晝陰隴月朝落秋風蕭蕭
 兮寒水淥長江一去兮無迴復冥冥魂魄兮何所依
 兒女肝腸兮斷難續天地日月何沈昏倚歎克己兮
 命不存傷哉此去不復返千秋萬古扃泉門

古刻
叢鈔

程山甫

山甫江西人咸通中布衣隱居廬岳

唐臨江郡故何長史府君墓誌銘

并序

有唐臨江郡府君何氏諱俛字太常則唐叔虞孫韓

氏之苗裔鳳池曾公之遠允因道趾廬阜遂家于江
州尋陽縣丹桂鄉香谷里皇朝請郎試左武衛長史
退居雲林高尙其仕高祖諱元琮曾祖諱承裕祖諱
煎考諱溥長兄諱建次兄諱鑑外清河郡張氏府君
婚汝南郡周氏生三男長曰元廣婚周氏次曰友稜
先婚嚴氏次查氏李氏歆歆俱不幸先歿次曰元袞
婚周氏次曰元壽婚彭氏元壽外丹楊朱氏親姻茂
盛孰如是焉府君淑順恭信行德謙柔福會良疇高
蹈雲水美玉不炫聲價益高素琴不調五音自足百
祿雖備壽不永脩斯天之貽咎何神理能保其至德

哉以咸通七年歲次丙戌七月廿五日臥疾逾月終
於私第享齡六十有六以其年十一月壬寅朔十九
日庚申卜其窀穸於大塋之內而窆焉崗巒興伏羣
岫低昂雲水縈流溪谷迴合卽何氏異世之所授耶
府君性行秉質清真坦夷介潔無虞直道自處嗚呼
明星滅曜劍墜平津雲鎖碧山霧郁寒水親朋痛切
閭里哀傷楚悼之情悲莫能已廣稜袞壽等仁貌蘊
叶行恪溫儒材器天資口標郡里次子稜讀書爲文
脩進士業早以戀承怙恃未赴貢幃業盛昌晞名譽
高遠林巒得志守節義謙素其間居上下無怨至其

四方之人咸相謂曰何君即今之賢達之士也其第
三子衮又法名思齊性好元門身披羽服堅持科誡
食柏餌芝志樂煙霞逍遙冲寂山甫不揆瑣味叨竊
煙霞側聆休風輒錄斯序廣等馮墓泣血託爲撰述
□誌銘曰

鳳池遠裔德並嵩萊郡間領袖邦國良材志奪冰霜
□同秋月劍剗琨犀□□明節日月逝矣德辰一沈
鄰杵無相百牙絕琴大塋之域茱萸原東□實誰墓
長史何公古刻
叢鈔

李直

直系出趙郡咸通中人

唐扶風馬氏故夫人清河張氏墓誌銘

并序

夫人諱慶本望清河郡人也夫人即□公之長女也
夫人立性柔和齷齪知禮閨門之教不肅而成及以
笄年歸于扶風馬氏琴瑟諧韻幾移星霜敬夫如賓
卹下如子□□何顯□情易隔□花見□何曷忽染
微疾藥餌無徵以咸通四年□□□沒於天長鄉
之私室春秋五十有八親愛情慟缺八難照長夜本
姻結髮同於百年事與願違缺八璠璣將仕郎前守
亳州鹿邑縣尉以缺十陳州項城縣尉□□修己□

仕郎缺十將仕郎□□陳州項城縣主簿缺十有女
二人長女適渤海吳氏次女適項城缺八匍匐主喪
孝過於禮銜恤問禮恭修齋祭無不頌誠□□恭悲
逾於常禮以當年五月廿七日安葬于杭州鹽官縣
西□里海昌鄉秧田村昌宓里買得郁師周地東至
孫旺西至郁師周南至□浜北至郁為新塋禮也墳
壠儼成雖存沒異路夫妻□□莫大焉伏恐桑田
改變陵谷難分因刊貞石乃為銘曰
肅肅為人德行先□幽明易分恩愛難別紅顏既無
白日先沒徒感松風空悲壠月廣□直書千歲不□

海昌
備志

許舟

舟咸通中鄉貢進士攝幽州大都督府參軍

唐故幽州隨使節度押衙正議大夫檢校國子

祭酒兼侍御史上柱國太原王府君夫人清

河張氏合祔墓誌銘

并序

府君之先周靈之後秦有翦而漢有吉晉有導而齊
有儉洎乎貴業繁盛高原三分或撫俗中區或字兵
窮褻蘭蓀衍馥寔為飽其風光杞梓垂榮誰可殫其
簡牘曾祖諱清皇前攝貝州錄事參軍祖諱選皇前

攝瀛州河間縣尉列考諱盈皇銀青光祿大夫檢校
鴻臚卿府君卽令嗣也諱公晟字嗣復義冠金石量
韜河嶽動息成韻恩威有文叱吒而生谷風談笑而
揚春卉由勇張白猿臂席髭一諾千金致命如往元
戎以挺生襟抱迥出人寰初其宿衛之資終致建牙
之署事家邦而不危人望輸忠赤而獨擅君恩何當
匪石之誠忽掩虞泉之恨嗚呼享年六十九以咸通
十一年庚寅歲夏六月二日屬纊於蓊縣軍都坊之
私第以八月四日成事於幽都縣保大鄉樊村里之
高原終其禮也夫人清河張氏結髮移天敬承禋祀

豈期超忽先之去流聞壺柔明孰云箴誠以茲良兆
可耐所天有子四人長曰宏太攝蓊州三河縣丞幼
敏公忠頗閑吏理方圖晚器倏謝明時次曰宏雅閎
禮敦詩親人重義授以文職優之漸鴻補充節度駢
使官次曰宏寂履行趨庭方宜仕進祇皇靡叶鞠爲
泉人次曰宏楚情韜百行心佩五常仗文武之全材
爲國家之模範補充節度衙前散虞侯於戲天道污
隆人經否泰雖藏舟欲固而覆軌難移導其道而奚
所悲履其理而竟何恨令子伏甕飲溢假喘興言事
恐陵谷推遷高卑迭運固命荒鯁誌於他齡銘曰

天降英靈兮壯我雄方
弼諧造化兮爲棟爲梁
施武力兮折銳摧剛
勤王事兮披肝倒腸
上天速禍兮殪忠良
抱堅白兮歸泉堂
逝川杳日只如此
松檟風生徒自傷

古誌
石華

胡錡

錡咸通間進士

賀曹尚書子希幹及第啓節句

桂枝折處著萊子之采
衣楊葉穿時用魯連之舊箭
分之名第故也
一千里外觀上國之風光
十萬軍前展長安之春色

唐
唐撫

段公路

公路東牟人鄒平公文昌孫萬年縣尉著有北戶錄

禱孟公祝詞

公路咸通辛卯年從茂名歸南海陸盡東口行次水
程舟人具牢醴以祭船神請愚爲祝詞曰
歲在單闕時及朱明柳絮風老桃華水平倚欄櫂兮
淺岸張布帆兮長汀粵有舟子請禱玄冥孟家遂卽
建高檣開左郭列牲牴呼著作召靈胥邀海若對蛟
浦而烹牢當鹿床而命爵於是具六味羅八珍羽毛
咸備蘇膏必陳剖蠅陸兮合雜剝博帶兮繽紛螭玉

色魚錦文噎鳩餅脆騎驢酒新無非可口兼乃着人
 果則獨根橄欖焦核荔枝三節肝賭細腰蹙咨署預
 蠡齋素藉烏裊委盤纂纂堆案離離更有越方之儔
 解悟之輩或衣朱裳或塗翠黛奏曲搗絃燃膠蒸蕙
 初敘訶而迴瞻遂傳詞而連捷詞云神下降兮龍驤
 巫歡喜兮鼠態駕雷電兮熒煌擁煙雲兮飄颻又曰
 船容裊兮何在檣安穩兮徘徊絕駕波兮此去隨駛
 潮兮竭來北戶錄

馬郁

郁咸通中鄉貢進士

維唐故隴西李府君墓誌銘 并序

顏子淵死孔子曰德行厥躬不實殂落命矣夫盛哉
 歟府君之德壽也府君名扶其本黃帝孫顓頊之後
 自周秦漢代翼衛正道軒冕不絕至後漢治書御史
 諱楷生五子三子從居趙汜為東南西宅是為趙郡
 三祖二子流寓隴西成紀而子孫因其家焉府君即
 成紀之後也曾祖諱紹清名蓋代素節不仕祖諱愔
 抱經緯蓋世之才負宏奧不羈之略嘗以珠紫為玷
 行之服簪纓為拘身之械固避世林泉恥於諂諛詭
 佞樂道不仕大父諱曼少耽詩酒長傲風雲逸器不

羣壯心獨步直志難摧馱弃浮名處士終老府君卽
處士之子也幼而聰敏長抱全才倜儻英明智有餘
仞冠歲志學有聚螢積雪之勤無便僻進取之佞承
先人之遺志也優游雲水靡不臻涉屆青蒲以南據
吳渚北倚秦泓崗原膏腴封疆秀楸周眎慨然遂有
栖止之趣於是居焉及寓于此二十餘載官僚親仁
閭里仰重門環多士到屣之清風大行席擁琴書雅
韻之良音滿室悲夫以咸通四年六月廿九日終于
杜父里之第享年六十九嗚噫生也人敬之歿也人
思之餘芳藹然經時益茂不朽之譽孰過於斯繇是

君子佳之嗣子鉢得先人遺德不墜弓裘沉靜而潔
已清啓慧而藝能箸夫人彭城劉氏少聳婦德長峻
母儀柔淑洽聞規矩可範生二女一人適東海徐遜
千卷書生一枝晉郟一人從天水趙邨秀又温明松
秋玉朗夫人汝南周氏植德無徵早從風燭生嗣子
翼教有方致茲右德育二女一人許嫁河東衛從狀
貫英華傑出人表一人歸北海儲瑜温潤而珪璋比
容峭直而松筠並秀蓋府君之良選也咸抱怛腹之
材皆負孤標之格嗣子娶東海徐氏前進士羣之愛
女也箴規自得於家風儒墨傑彰於君父嗚呼子婚

身立女配合德君之幹歟家肥道直歿無餘累君之
強歟兆於形有生死苦樂以兒女之情悲夫至明年
二月十三日卜葬于縣之兌宜陵鄉白露里之原鉢
號泣而言曰慮陵谷遷越俾陳辭刻石郁性本無文
謬居是邑久嚮嘉譽因敢直書握管凄神乃爲銘云
大患旣形兮賢愚不一稟生知兮秀而何實必承勢
兮以浮以沉分明滅兮終得終失奄利刃於黃泉埋
金石於白日在火玉兮寒色凜然局重匣兮劍光逾
出冀神明兮不昧無欺厚子孫兮祿壽彌溢

張元勿

石刻

元勿咸通朝御食使登事郎上柱國賜緋魚袋

唐故朝議郎守徐州功曹參軍上柱國劉公墓

誌銘

公諱仕備字元同彭城人也祖諱光奇開府知內侍
省事父皇諱英閏特進太夫人楊氏妻張氏先終公
有二女長適田氏次適張氏一男曰壽郎先逝次曰
齊宴年十二公氣含清韻獨異貞姿業廣藝深事皆
天假孤標狀喬松之拔衆林朗質若秋蟾之懸碧落
溫恭克己節儉終身順協于家忠貞于國公寶歷二
年六月五日奏授出身累參選序數授令丞後任徐

州功曹參軍公紀綱一郡椽理六聯清貧而吏靡忍
 欺單步而人懷□□操心政理美譽溢彰枳棘非鸞
 鳳之所栖百里豈大賢之所任公性親立與志慕雲
 霞朝披黃老之書暮覽□□之要誼躡每歌蟬蛻歸
 元身既離於俗塵名定□於紫府公咸通七年十二
 月一日終於輔興里春秋八十矣八年正月廿五日
 葬于長安縣龍首鄉嗚呼寒暑忽侵纏綿數載針藥
 無瘳百齡斯泯嗟夫盛衰生死實可痛哉乃為銘
 波瀾不息逝水孱孱浩浩悲風摧□何遄于生永訣
 一往無還刻石

温憲

憲詩人庭筠子光啓中及第山南從事

唐集賢直院官榮王府長史程公墓誌銘并序

程氏之先出自伯休其後程嬰春秋時存趙孤以節
 義稱故奕世有令聞公諱脩己字彥立曾祖仁福左
 金吾衛將軍祖鳳婺州文學父儀蘇州監博士公幼
 年英敏通左氏春秋舉孝廉來京師遊公卿名人間
 能言齊梁故實而於六法得姿稟天賜自顧陸以來
 簞絕獨出唯公一人而已太和中陳丞相言公於昭
 獻因授浮梁尉賜緋魚袋直集賢殿累遷至太子中

舍凡七爲王府長史趙郡李弘度有盛名常有鬪雞
爲其對傷首異日公圖其勝者而其對因壞籠怒出
擊傷其畫李愕然大駭昭獻常所幸犬名盧兒一旦
有弊蓋之歎上命公圖其形宮中畋犬見者皆俯伏
上寵禮特厚留於祕院凡九年問民間事公拊口不
對間取內府法書名畫日夕指擿利病上又令作竹
障數十幅旣成因別爲詩命翰林學士陳夷行等和
之盛傳於世公於草隸亦精章陵玉冊及懿安太后
謚冊皆公之書也丞相衛國公聞有客藏右軍書帖
一幅衛國公購以千金因持以示公公曰此修己給

彼而非眞也因以水濡紙抉起果有公之姓字其爲
桃杏百卉蜂蝶蟬雀造物者不能爭其妙□其際仍
備盡法則筆不妄下世人有得公片迹者其緘寶航
翫□□古昔公嘗云周侈傷其峻張□□其澹□□
盡之其唯韓乎又曰吳恠逸元通陳象似幽恣揚若
痿之強起□許若市中驚食性夷雅踈澹白皙美風
姿趙郡李遠見之以爲沈約謝朓之流大中初詞人
李商隱每從公遊以爲清言元味可雪緇垢憲嚴君
有盛名於世亦朝夕與公申莫逆之契高遊勝引非
公不得預其伍公又爲昭憲畫毛詩疏圖藏于內府

以咸通四年二月一日遭疾歿於京國里第享年□
十九先娶萊氏有子三人長曰進思鄜州甘泉主簿
次曰退思詩歌尤高妙與乃公迹殆相亂又其次曰
再思於小學靡不通工篆籀其爲狀澹古道健後娶
石氏有女二人長適滑州韋城縣尉景紹一女幼石
氏亦先公而亡以其年四月十七日葬于京兆府萬
年縣姜尹村憲嘗爲詠蝮蝮詩公稱其句因作竹暎
杏花畫三蝶相從以寫其思其孤以憲辱公之眚遂
泣血請銘銘曰
五曜垂晶羣山降靈鍾茲間氣歸我昌庭遇物生象

乘機肖形情通盼嚮思入微冥顧陸遺蹤李張舊轍
芳塵寂寥妙迹蕪沒故筆空存神毫永輟千齡万祀
慘淡夷滅石刻

劉從周

從周乾符中光祿卿

劉氏幼子葬銘

大唐乾符二年歲次乙未四月廿日壬申彭城劉氏
幼子年七歲終于昇平里之私第雉齒未名小号阿
返曾祖諱廷珎左驍衛大將軍封東陽郡王食實封
二百戶興元元從著勳當時祖諱汚太子太傅贈司

徒功書竹帛事載國史故不備述也父曰從周光祿卿致仕絕跡名利嗚呼汝襁褓敏慧戲弄有方逮至齟舛舉動老成方欲傳汝箕裘慶爾門閭吾負神明謫汝何速以此哀慟痛何能已以其月廿四日卜兆去吉祔葬于長安縣第五村親伯杞王傅德章之塋扶輿號天泣血塋塋乃爲銘曰

阿返阿返壽何促焉詩書禮樂方期訓焉未就吾志奄歸黃泉蘭萎珠碎兄姊摧焉龜筮告吉窀穸是遷慮變陵□寘于墓田

石刻

劉氏室女墓銘

唐乾符二年歲次乙未七月十日庚寅彭城劉氏室女享年二十終于昇平里之私第曾祖庭珪右驍衛大將軍封東陽郡王贈右僕射祖沔太子太傅贈司徒勳望一時事載史策皇考德章杞王傅御史中丞嗚呼小號定師卽中憲之季女也懿毓生知柔順幼備動合規矩雅爲人師喜愠未常形於色是非罕曾恣於言唯以靜默自修孝悌雍睦實閨闈之令淑訓家之軌躅者也嗚呼福善無徵遭疾膏肓伏枕未久奄忽而謝日月流邁龜筮有期以其年八月廿八日祔葬于長安縣第五村之先塋余追念無已痛徹心

靈泣血叙哀寄于墓銘神道降祥挺秀明德禮法是
遵慈仁被物彤史流芳垂為令則親叔銀青光祿大
夫光祿卿致仕劉從周石刻

楊檢

檢乾符中京兆府兵曹參軍

唐故嶺南節度使右常侍楊公女子書墓誌

□□諱芸字子書隋越國公素之裔顯考公常□□
君諱發第七女曾祖公諱藏器邠州三水□□□祖
公諱遺直贈右僕射府君名重於時□□□世子書
之諸姊皆託華胄如戶部侍郎翰林學士劉公承雍

五朝達皆子書之姊聳子書自童年則不隨稚輩戲
遊端默靜慮有成人童不甚絲竹寡翫好諸兄所習
史氏經籍子集文選必從授之覽不再釋盡得理義
勤□隸學巧于女功喜不形色愠□□容內外推敬
稱非凡女會乾符五歲夏京師癘疫子書之兄姊姪
妹危疹者相次□子書省祖□悴憂勞內侵疾不涉
旬竟厄天壽以六月七日終于□福里第春秋廿十
月廿八日葬于長安縣南原姜允村嗚呼天與其淑
而不與其壽爰□灼灼忽落疾風四氣輪謝時可辨
乎於是其兄慟血而銘曰

華五族兮成吾之妹悴吾門兮德亦其除吁嗟天兮
付不俱石口生有恨兮泣血漣洳刻

孫溶

溶樂安人

唐故前河南府錄事天水趙公墓誌銘

嗟夫瑞雲將布俄散彩於晴空皓月正圓忽摧輪於
天上即知吉氣難駐祥光易虧非唯動息之所瞻實
亦神靈之所歎何殊俊造奄及泉臺將紀嘉猷難申
執筆公諱虔章字敬彝京兆長安人也昆仲四人歡
侍左右公異才也量宗大節不愧小慈禮樂生知敏



捷天受視扶空之蟠棟不足崢嶸觀截海之螭梁未
為碑兀鳳鶴寫雍容之質水壺灑洞澈之風纔及弱
冠之年寵授糺曹之貴莫不清兼洛水秀台嵩雲譽
滿東畿名傳西口必謂壽等五千之仞榮稱百萬斯
年何期清史而猶口標奇黃泉而已為歸路嗚呼天
虧一柱嶽折高峯斬口之劍刃剛摧射猿之雕弓絃
斷並雲銷於瞬息方月口於逡巡比逝賢良未足為
痛以乾符三年九月六日告終于平康里私第而丹
旒言旋蒼龜告吉擇用其月廿日葬于萬年縣寧安
鄉三趙村祖之塋側也今則泉路永塞逝水不還慮

陵變遷略紀貞石其銘曰

肅肅令德雍雍至仁玉質纔成冰霜始新謹孝無比
忠貞絕倫於家克儉於邦克勤詎料花發風起清晨
來飄蕪謝紅香浸塵龍城之側灞澹之濱一葬其中
三趙為隣風悲雨泣慘骨傷神泉門永固千春万春
古誌
石華

莫雲孚

雲孚乾符中人

城山寺殘經幢

巨唐乾符三年歲在丙申十月甲辰朔十二日乙卯

功主莫雲孚并妻楊十一娘男惟信惟忠闔宅長幼
等自捨淨財建立法幢奉為國王帝主州縣案□□
□□□□□其有餘分功德奉資一祠先靈并及亡
男惟簡等願早超淨域永離□途同□□福□□□

□歲湖州府志

張寶

賓中和中節度駐使官

唐故幽州隨使節度押衙遙攝鎮安軍使充綾
錦坊使銀青光祿大夫檢校國子祭酒兼御
史中丞上柱國平陽郡敬府君墓誌銘 并序

府君諱延祚字延祚其先平陽郡人也繁宗盛裔不廣叙焉遂授隨使節度押衙遙攝鎮安軍使充綾錦坊使於戲壽之與天不保黃髮孝諱全紀充北衙將判官曾祖諱包攝幽都縣令祖諱輝守宣州右丞相業富韜鈴才多經濟忠勤王士無徇家私府君性稟冲和志惟端厚早備成人之器德懷鑒物之明藉材能具精官業謙以自牧惠乃知人不恃寵以驕身不怒而臨下轅門旌能移掌坊務於是繕修戎器淬勦鋒矛私用無闕於軍資戈鋌蓋兼於武庫久處繁難之任尤彰廉儉之名時推貞幹咸仰清勤是以洪

鍾發而聲揚自遠寒松茂而秀且不羣於戲修短有定榮辱是常以中和二年九月十八日終於昌平縣界永甯村之私第享年卅有六以中和三年二月十一日葬於薊縣界會川鄉鄧村里之原禮也夫人清河郡張氏行潔冰霜德芳蘭桂情殷葛藟量協螽蟴冀期金石借韻琴瑟無虧不圖杞梓毀摧絲蘿無託痛傷熟質恨切蕙心有子三人長曰行修充親事副將次曰行益充親事虞候次進郎並性行溫淳言無朽葉悲號毀性哀慘過情泣血漣洳邁王脩之社崩摧莫制同隱之以感隣夫人哀纏荼毒痛絕肺肝嗟

乎老之將至獨存秀而不實先殞猶恐陵谷遷變乘
海有更刊綿綿之清譽記鬱鬱之佳城乃命瑣才紀
諸豐石銘曰

誰謂斯人罹此禍端誰爲懽笑翻爲愁顏名留世表
神歸不還記誌景行恐變何山

古誌
石華

徐膠

膠廣明中鄉貢進士攝滄州司馬

大唐故幽州節度要籍祖君夫人宏農楊氏墓

志銘 并序

楊之受氏宗於有周始於魯史所傳迨乎唐年攸盛

歷代軒冕嗣光簡書今不復云矣曾祖昇皇不仕祖
輔皇攝幽州安口縣令父瀛皇不仕夫人家奉詩書
門續青紫漬潤從生之善道聽聞未教之清規故動
叶禮經言作世躅泊乎成人之歲以父兄之命歸于
祖氏及移彼天益煥明德率盡乃性爰穆其親加以
學道自怡探微愈晦閨門坐肅埃塏潛融故夫人之
子曠不仕王侯高眠藪澤洞啓老莊之扇鑄退全箕
穎之性情魯連三辭不口譚笑萊子五綵自悅晨昏
笥中之龜質堪悲天上之鶴書莫起嗚呼時當訛薄
人寡坦夷竟以勞生罕躋中壽而夫人逍遙外物怡

澹安貞克保遐長諒因頤養以廣明三年七月十四
 日終于滄州清池縣善化坊享年八十五是歲改元
 中和以十一月八日葬於所終之邑立都鄉流祥里
 惟曠跡類漂梗禮至茹荼情疚送終資自良友塗芻
 潛備松檟克完其道實高其孝彌顯夫人女二人長
 適李氏次適劉氏咸稟夫人之明勗成口口之嘉猷
 曠與余交分不渝素風備熟俾其紀石難讓濡毫銘
 曰
 口口儀苻彼內則進盥逾恭柔聲靡忒雍穆其道
 馨香在德閨閫益清口裳去節暗謝繁華堅歸寂默

壽考保終希夷自得誠子遁跡遠辱全生輕辭世網
 靜褫塵纓上士斯達口者何營伊誰砥礪本我高明
 碧岫無業滄郊寄坐難詳彼美空愧斯銘

常山貞石志

史歸舜

歸舜光啓間鄉貢進士

隋羅尼經石幢讚

并序

佛興西土俾萬有以歸真像教東流與羣迷而正覺
 爰從達者旨是得除疑慕善求安應聲聞嚮當縣近
 因兵革實有侵凌犬戎恣暴口之心人口致流離之
 苦唯茲郭邑備以堅牢既大振雄謀實內依佛力有

清信士張宏建等並理探空界性入元關每動樞機
事皆宏益是以人稱領袖眾乃依歸俱在艱時同
□聖□□□勢迴戈甲氣殲妖氛□□隕於狼星朝
再聞於魚梵今則邑居不動庶類無傷由是志誠皆
蒙福覆沉思至理何路致酌無非樹善言徵久遠誘
人歸正斯所謂顯靈驗於一時□□□於後世也是
邑人等各出淨財遠求良匠造玉石幢一所上剎佛
頂尊勝陀羅尼立於康衢之內是上報慈悲而旁返
慶祚雕鏤既畢合吉公門時縣尹宏農公軒蓋始臨
缺五於金人妙道無不□通樂聞其請尋而允之此

小建善之有因眾功之合就也遂於四月八日會同
緣而立之時光啓二年丙午歲也歸舜獲逢勝事敢
不讚揚遂錄其實耳

佛有聖力人莫能知一句一偈大慈大悲无量功德
不可思議言以災難尋聲救之是邑之人忽離覓孽
念彼奔衝憂其殒絕金鼓屢振鵝鶴頻役不告諸仙
何由見雪非無應兆□有降臨豺虎潛遁氛埃自沉
靡言在命實由信心既免災難道情轉深但念有情
無不霑福何以報之莫施瓊玉靈蹤聖跡唯紀與錄
傳於後時言之不足立其貞石刻以真言□揚妙道

救獲無邊正覺正果三千大千報仏之所長爲福田
常山貞石志

[Faint bleed-through text from the reverse side of the page]



唐文拾遺卷之三十三

榮祿大夫三品頂戴前分巡廣東高廉道加四級臣陸心源輯

張禕

禕昭宗時歷官兵部尙書舊書有傳

南龕題名記

聖上西巡之辰余自金門飛騎追扈大駕中途隔烟
塵遁跡及中秋方達行在由青瑣判吏視事未浹旬
復歸內署明年自貳口授是官又明年出綰是職奉
命先鑿輅之神都俾緝舊綱行次口缺遇軍變乃間
道俟通於茲郡缺是塵清路遂山秀川明方與缺博

酣於臨眺忽有賁函而登缺出天書以示促赴行朝
將缺是境得無紀焉表兄巢湖處缺薛瓚前進士封
舜卿姪曙同缺中和四年甲辰三月八日尚書右丞
判戶部張禕記時為姪暖等修釋迦像遂刊於此金石
苑

戴師顛

師顛僖宗時人

戴府君墓誌 并序

府君諱芳魯國郡人祖諱蔽父諱素府君素之第四
子娶東海徐氏育子五人二女三男長子師顛次子

師旭少子師敏府君温良恭儉讓志惟清雅惟孝惟
忠琴酒戴不仕何圖積善無徵凶疊春秋六十有三
寢疾醫藥無效大化有終中和三年秋八月廿五日
終至其年季冬之月初五日丁酉吉辰窆為吳郡東
南華亭縣北廿二里去張管墩五里莞沼鄉城山里
進賢村洞涇西一百卅步新宅之東南而葬新塋禮
也三男泣血二女哀號長子師顛等恐歲月久遠陵
谷變移不託時世今乃刊巵為記銘曰
晚暉西落流水東馳存亡永訣逝者無歸萬古千秋
墳壠巍巍是誰書雙鯉魚是誰讀雙白鶴鯉魚入

深泉□□□□□古刻叢鈔

李景莊

景莊乾符中刑部侍郎

應配流人就近奏

配州府流人流刑三等流二千里至流三千里每五

百里為一等准律諸犯流應配者二流俱役一年稱

加役流三千里役三年役滿及會赦免役者即于配

所從戶口例今後望請諸流人應配者依所配里數

無要重城鎮之處仍逐罪配之准得就近唐會要四十一

高駢

全唐文八百二有傳

尋訪褚遂良後裔護喪歸葬奏

愛州日南郡北五里有故中書令河南元忠公褚遂

良墓前都護崔耿大中六年因訪邱墳別立碑記云

顯慶三年歿于海上殯于此地二男一孫祔焉伏乞

尋訪苗裔護喪歸葬唐會要四十五

致周寶書

伏承走馬已及奔牛今附蓋一瓶葛粉十斤以充道

路所要南部新書

逐西川僧法進判

斷臂既是凶人刺血必非善事貝多葉上不許塵埃俗子身中豈堪腥膩宜令出境無得惑人與一繩遞

出東界

北夢瑣言

司空圖

全唐文八百七有傳

李公確行狀

公有出倫之才為時輩妬忌罹於非橫其平生著文有百家著諸心要文集三十卷品流誌五卷易之心要三卷注論語一部明無為上下二一作三篇義說一篇倉卒之辰焚於賊火時人無所聞也惜哉陽春白

雪世人寡和豈虛言也

北夢瑣言

胡曾

全唐文八百八有傳

代高駢檄南蠻

欲慕平交妄希抗禮何異持衡秤地舉尺量天越嶺新州牂牁故地不在周封之內非居禹跡之中曩日邊將邀勳妄圖吞併得之如手加駢拇失之若頷去贅瘤九牛之落一毛六馬之亡半毳何足喻哉

鑿戒錄

白宏儒

全唐文八百十六有傳

請廢諸太子廟附莊恪廟奏

按此奏見唐會要卷十九今存其目文與全唐文白宏侯作同不錄

黃璞

全唐文八百十七有傳

觀察使檢校司徒兼御史大夫陳巖墓誌

府君以大順三年薨春秋四十四江夏黃璞爲名士傳以伸之又爲神道碑以明之府君諱巖字夢臣曾祖父諱宏字文保爲當府司馬王父諱好古贈太子舍人父諱簡字言史贈工部尚書又贈羽林大將軍

太夫人贈會稽郡太君又贈衛國太夫人府君幼而徇齊不爲兒弄長逢離亂思婦妖氛登□則神鬼宵奔揮劍則機槍星落廉使滎陽公鑑夙慕英風累咨□畫請爲都團練副使仍判清源又三發疏章請□交代滎陽公尋告疾北歸公威以肅衆寬以撫□賣刀佩犢再揚龔遂之風左誦右絃大闡文翁之化合浦靈珠睽□光於五夜漁陽瑞麥吐秀色於連年家
家吟多袴之謠處處詠如坻之什朝廷嘉歎就加工部尚書兵部尚書未幾又加右僕射左僕射不二年又加司空噫雖則委珠道著益彰衣錦之榮然而治

水功成未捧陶鈞之命甘棠勿翦講樹空存哀哀生靈何嗟及矣夫人錢塘范氏出自令門婦於華族口垂範於金閨驟霑榮於石窠非惟敦敬孝悌多奉以家規至於恤物愛民亦得於內助口封錢塘郡夫人有六子長曰延晦太子司議次延口一子出身守閩縣尉次延冕睦王府參軍次口口次延曦皆秀掩稽松茂踰緒柳儼然在疚柴毀踰禮吾知聚星之德其未艾矣有女二人長適口判滎陽公口適太子正字董承和即瀨東廉問相國之令子孫男二人長曰肇任長樂縣令次曰口檢校工部尚書守漳州刺史兼

御史大夫材質豐傑字量沈厚府君以景福二年八月十四日唐於閩縣敦業鄉太平里口山之陽銘曰

大滂仁化蘇凋俗生植霑如膏雨沃方嘉九年重戴天豈口一旦口口閩山上閩山足佳城鬱鬱松阡綠逝者徒云可口錄福建通志

顏蕘

全唐文八百二十九有傳

自草墓誌

寓于東吳與吳郡陸龜蒙為詩論之交一紀無踰龜

卷三十三
六
蒙卒爲其就木至穴情禮不缺其後卽故諫議大夫
高公丞之故丞相陸公展二君於蕘至死不變其餘
面交皆如攜手過市見利卽解攜而去莫我知也復
有吏部尙書薛公貽矩兵部侍郎于公兢中書舍人
鄭公撰三君子者余今日已前不變不知異日見余
骨肉孤幼復如何哉

北夢瑣言

鄭谷

谷字守愚宜春人光啓二年進士乾甯中仕至都官
郎中

雲臺編序

谷勤苦於風雅者自騎竹之年則有賦咏雖屬對聲
律未暢而不無旨諷同年丈人古川守李公朋同官
丈人馬博士戴嘗撫頂歎勉謂他日必垂名及冠則
編軸盈笥求試春闈歷于於大匠故少師相國太原
公深推獎之故薛許昌能李建州類不以晚輩見待
預於唱和之流而忝所得爲多游舉場凡十六年著
述近千餘首自可者無幾登第之後孜孜忘倦甚於
始學也喪亂奔離散墜略盡乾寧初上幸三峯朝謁
多暇寓止雲臺道舍因以所記或得章句綴于牋毫
或得於故侯屋壁或聞於江左近儒或祗省一聯或

不知落句遂拾墜補遺編成三百首分爲上中下三卷目之爲雲臺編所不能自負初心非敢矜於作者

康駢

駢字駕言池陽人乾符四年登進士第官至崇文館校書郎

劇談錄序

駢咸通中始隨鄉賦以薄伎貢於春官爰及竊名殆將一紀其閒退黜羈寓旅平秦甸洛師新見異聞常思紀述或得史館殘事聚於竹素之間進趨不遑未暇編綴及寇犯天邑挈歸漁樵屬江表亂離亡逸都

盡景福乾寧之際耦耕於池陽山中閉關雲林罕值三益而又環堵之內闕於墳典思欲叙他日之遊談迹先王之軌範不可得矣然則平昔之道本爲於文旣未能立匡世之功名又安得舍窮愁之翰墨因想時經喪亂代隔中興人事變更邈同千載寂寥堙沒知者漸稀是以耘耨之餘粗成前志所記亦多遺漏非詳悉者不復叙焉分爲二編目之曰劇談錄文義旣拙復無雕麗之詞亦觀小說家流聊以傳諸好事者乾寧二年建巳月池州黃老山白社序

足本劇談錄

蔡德章

德章廣明時人守藤州刺史持節藤州諸軍事

唐故朝議郎前行宣州南陵縣尉柱國張府君

墓誌銘 并序

夫銘者稱其美也記歷年代載標行德因夫子識秦
始皇後必開發吾墓顏回以下乃誌識詞於墓內使
始皇見之知我先師聖焉又至後漢滕公夏侯嬰將
葬佳城駟馬不進而鳴乃掘其下遇有穴室中得石
記亦有識文是以先王製禮勒石于泉慮陵谷有遷
以明柩之德位也公名師儒其先清河人也曾祖景
仁祖昊父南素並不仕公卽家任之子也器宇凝正

容範端華檢性依方飾躬由禮進身而先物約已而
厚人言合詩書動遵法式自少小以勤學苦節而立
其身始自豸府從職能以幹敏奉公前後憲長無不
委用或以紕繩之政而立紀綱或竭節推刑爲霜臺
之領袖優滿授坊州昇平縣主簿秩滿授宣州南陵
縣尉兩任之政恪著公勤太守常以重難而委寄也
邑人遵凜惕懼於製錦之威賦稅及期一境無逋懸
之簿旣之罷任方欲歸輦荏苒未進適值浙江淮海
等道而多寇逆所在徵兵憂以路虞不通且駐宣城
之側以乾符五年七月初遘疾至其年八月一日終

于宣州權居之所享年七十有二時第三男溥自京侍從至南陵數載不曾暫闕晨昏侍疾求鑿而忘寢食公歿之後護喪歸京涉歷山河皆□途步周迴委曲三千餘里二百餘晨方達家邑孝道之志此男偏臻曾參之儀祇之此也公之先域在於馮翊近載緣諸子從職多在諸方南北駢馳離鄉日久遂逐便移家於上都崇仁之里靈筵之禮備之于堂以廣明元年十月五日乙酉吉辰歸葬於萬年縣寧安鄉新塋之禮也夫人王氏以其糟糠之情饗祭從便阻以地遠恐後違時不赴馮翊舊鄉慮其子孫闕春秋之祀

而從近焉乃卜新阡在鳳樓原也防其異日無虧灑掃之儀子孫團圓不墜松楸之主伏以賢夫人太原大族之家引駕王公魯之女也懷敬姜之志襲梁鴻之風嘗以內循機筭之勤外豐賓客之膳親族仰重四德不虧有男四人長曰洙見義武軍節度都押衙銀青光祿大夫檢校國子祭酒前隴州長史兼御史中丞屬以時當沙陁悖亂逆臣李國昌侵逼邊陲節度使王公知洙有韜略之機籌筭之握委領兵士剪伐羗戎果獲收復鎮城招攜戶口上聞帝闕表以殊功卽領郡符必酬前効不久之際新命當臨公之此

子光前絕後迺是德章外甥女晉備執德行請以爲誌次子曰汾見豕府從宦而有出羣之藝主執奏章頗立勤劾卽有榮遷次曰溥乃是侍從南陵無虧晨省護喪歸邑不憚苦辛亦非久必榮家族也次曰湜與義武軍節度王公弟左神策軍糧料使弘紹同勾當供軍之務並各負凌雲之氣皆懷孝道之心盛德出於眾人光顯彰於前代有女一人娉同州押衙王袞尋終遐壽袞及女孫悉在兒孫二人長名難胡卽男洙之子也年未弱冠亦是成器之寶豹澤貴顯之材次曰周兒乃是溥之子也見在襁褓孫女二人長

適高翊守職鸞臺之內官授中郎之榮次女阿宜口口及笄公時當盛族年至從心雖歿殊鄉得歸帝里四男泣血一婦摧傷備舉哀歌靈儀崇列丹旒攸攸送歸新闕嗚呼水無返注日不東迴泉門旣掩永而不開刻石爲銘乃爲頌曰
溫溫府君令德出羣其聰莫比其孝有聞冲和茂著節操松筠兩佐名縣頗立殊勳方欲竭効遽有替人罷祿之後偶染疾身豈期倏忽異口之魂哀哉上蒼何至于怍行善云吉豈降其殃離京之日骨肉斷腸不料永隔生死分張號天口及叫地空傷卜其宅兆

遷赴立堂蕭蕭松柏杳杳白楊泉臺將掩隴樹無光
葬於新闕永鎮龍崗石刻

鄭貽贈鹿門詩集叙

并山川英淑奇麗當塞阨之衝古多豪士事武功健

馬垂光字內未有鉤錦繡一作秀絕擅聲詞翰者君出

其中翕輕清以為性結冷汰以為質煦鮮榮以為詞

偏於逸歌長句駿奔踔厲往往而劇李白杜甫死非
君而誰哉君諱彥謙字茂業咸通二年進士以文章

入仕操官履潔如其為文晚從王重榮辟從事河中

歷薊絳諸州刺史所至有能績光啓七年隱居鹿門

山以著述為任與施肩吾希聖薛能大拙為詩友而

二君皆以為不逮折行與交君卒藁多散落予為輯

綴僅二百餘篇黃鐘玉磬咸其章章者因題曰鹿門

集析為三卷武城鄭貽序席本唐詩

韓義賓日華黃武軍與師直義賓深州人仕成德節度判官檢校太子左庶子御

史中丞即忠獻王之五世祖也

唐定州別駕程君士庸墓誌銘

君諱士庸字仲謙定州安喜人也系高陽而綿緒氏
列國以興家自茲以降世際明德故能高姻美爵歷
秦漢而載盛崇基累構跨魏晉而逾顯高祖睦定州
刺史曾祖日華橫海軍使祖懷直歸誠王皇考權邢
國公或分土主戎威率數郡或陪武祗命康惠四方
君含璋以挺生稟和以凝氣弱不好弄早擅夙成語
嘿之機帥心則遠孝弟之至卽性載深道希四科文
贍百氏好賢之性得諸緇衣惡惡之心求之巷伯加
以神姿恢岸望之儼然雅氣貞夷聽言則厲賁秀正
園有聲邦黨固已墻幾數仞器踰萬頃者矣齒壯知

名州辟主簿治未浹辰民謠已著允可謂舉契唯良
功成共治者也義武節度尙書王公綏蒞雄藩雅君
令問下車之始辟君掌書記云今日之事猶李彊之
收君平望便降意成孤敢言爾其取重於時多類此
也遂以價重見珍轉定州別駕君乃導德齊刑威疆
恤寡千里移風四民樂業民頌政成君之力也王公
嘗從容衆中謝君而言曰海沂之康昔自王祥邦國
不空今復相賴因言是公此州管夷吾也廊廟之才
若置之周行則張茂先之流矣而道消當年運潛初
九惜哉及王公赴難京師君亦養性正華慕七子之

優游事三徑以嘉遯前言往行必得之於閨門温恭
 孝友亦穆之於宗黨宜延百壽木鐸烝民而福應宜
 嘿寢疾彌留春秋七十有八以中和元年十月廿二
 日卒於慈仁里宅遺文後事作範當時子巖孫秀等
 粵以其年十二月朔日遷窆於博野先塋惟君慎終
 追遠之風緯文經武之略信可以方衡四公齊驅萬
 石矣門生邢仁等悲云亡以潛目軫遺愛以茶心敬
 刊泉石用昭德音敢作銘曰

同源濬起分流遠扇周王修和程侯利建自茲以降
 官姻世緬於穆我君含中作彥義惟誕性孝以立身

識周先覺學廣前聞貞心潔玉秀氣貫雲龍潛或躍
 蠖屈載伸時惟聲恥運逾道消反躬紛靄養志蘅臯
 孺心遠慕鼓腹長謠育川比量望月齊高紛綸倚伏
 冥昧遭隨謂仁者壽曾不憖遺泉官一設壠路恆悲
 貞徽有篆永思無虧

新安文獻志

張士賓

士賓易武軍推勾官朝散郎行太子司議郎

大唐義武軍節都知兵馬使銀青光祿大夫檢
 校工部尚書兼御史大夫持節易州諸軍事
 易州刺史上柱國安定縣開國伯食邑九百

戶程公巖勳德碑頌

於戲君非臣無以化化臣非君無以贊贊惟天正明
命不絕有唐篤畀純臣以靖國難克蕩民沴將底于
成我太原王敬統舊服惠周于下下罔不格乃天祐
紀元甲戌春正月用都知兵馬使程公出復大命元
元以貞集大和也先是賊溫邁亂明毒中夏力政血
刑覆忠良殖奸宄蒸人側側不貳率乃戮王越在東
土受制宇下克懷弗寧邊在王室誕宣我化靡由爾
凶惟公敷聞帝庭奉若元命帝曰休哉正侯良哉厥
使可持節易州諸軍事易州刺史封安定縣開國伯

食邑九百戶表獻臣也越茲元惡明肆虐羣大侮王
度擅煞無人薄三州威五長摺紳管管不自卽乃工
王執在厲階罔怫祇命命我亞旅咨我近藩端恤遺
人人思反德式載無欲歸于本朝朝廷嘉茂功錫不
命授公檢校工部尚書兼御史大夫詔曰懿爾巖哉
審奉天威保乂邦土是用司國樞威懾奸回改革風
俗是用總朝憲公固讓不獲祇奉天之明命維時羣
盜貌聚于野公文招徠武殄暴服如化人謐不虞廬
廬旅旅以宴以處士訓業農力穡工就務商通貨四
者各正爾下日用乃蕃踰年羣吏更告天雨淫降頌

湧汴岸波積如阜奔灌乃雉骨恐爲魚其日固久公聚人行水度力陳工啓元導流事若天造層城巖巖居人坦坦庶德合于無疆歲庚午冬十一月溫益逞凶自汴襲趙殍軼殫寶度劉暴骨公乃贊王輯睦爾鄰推功于晉凡事得請命焉由是屯于高邑麇于栢鄉執忠奮威罔敢加害振旅還定王用嘉亨時夏大旱滌滌甫田百穀如焚人曰祈土龍公曰非早備乃貶躬之食勤人之瘼靡神不寅崇朝而雨秋河朔大饑易有年也壬申春二月賊臣守光戎性貪饒厚厲其人與溫濟惡爰以其黨伺間來寇放兵流毒延于

齊民民用齋咨涕洟籲公公曰不戢乃暴負乃人爰請于王合從晉趙會王師于易水之上恭行伐也獨夫惴惴天用勦焉乃破祁關下涿鹿二豎偕遁執其大醜馘于軍門敦奉王誅保和人極甲戌之春燕寇抵平疆場安靖或曰厚賦人公盡人篤焉對政不賦乃聳善抑惡發滯刊佚歲惠昭利六教旣備孳孳等心於是奏記于王王獎之文訪于趙趙崇之請諧六州允奉于晉賊不我制公用哆然由是匹夫匹婦蕩伏草莽越踐公境宣服公威惕惕瞿瞿攝進成序若公在首上集下望申命用良易人熙熙嗜化益休是

歲冬惟晉承制錫命我王用胙白茅副以金鉞昭崇
 武功允正師長進公銀青光祿大夫上柱國陪武主
 戎總經外政參酌彝典敬揚王休緊公德載于人人
 以蕃殖翼贊方伯翦除大凶聖咨乃賢神被乃祿其
 惟有終旨哉易中耆老師錫言曰奸臣反常迭寇東
 土人用慘黷殆無指告維公牧我有邦天眷爾下爾
 有君臣公正爾有父子公保爾有災厲公奠爾有稼
 穡公成維公疇依易大圯也賡曰昭茂德崇豐碑阜
 成于文庶永于世克建藥石勗揚頌聲頌曰
 維君配天維臣配君嶠嶠我公為君虎臣翼襄霸府

奄有世勳大盜囂囂荒我東鄙孔填不夷元元靡恃
 易人恃公乃有父子泮水湯湯我沴載懲曠魃炎炎
 我年載登我用有孚爾無不承維公之德浹于爾眾
 維公之勳朝野攸重貞石峩峩永以垂頌

新安文獻志

盧知猷

知猷字子暮簡能子第進士登宏辭文詞瞻麗科蕭鄴
 鎮荆南劔南辟掌書記後官至戶部尚書太子太師
 昭宗為劉季述所幽感憤卒贈太尉

盧鴻草堂圖後跋

相國鄒平段公家藏圖書並用所歷方鎮印記咸通

初余爲荊州從事與柯古同在蘭陵公幕下閱此軸
今所歷歲祀條逾二紀薦罹多難編軸尙存物在時
遷所宜興歎丁未年駕在岐山涿郡子暮記

己酉歲重九日專謁大儀遂載覽閱累經多難頓釋
愁襟子暮再題

避暑
錄話

張澹

澹字禹川本河間人屏居金鳳山後相僖宗昭宗時
貶官復以左僕射致仕爲朱全忠所害

太廟宮懸依古禮用二十架奏

臣伏準舊制太廟含元殿並設宮懸三十六架太清

宮南北郊社稷及諸殿庭並二十架今修奉樂懸太
廟合造三十六架臣今參議請依古禮用二十架伏
自兵興已來雅樂淪缺將爲修奉事實重難變通宜
務於酌中損益當循於寧儉臣聞諸舊史昔武王定
天下至周公相成王始暇制樂魏初無樂器及伶人
後稍得登歌會舉之樂明帝大明末詔增益之咸和
中鳩集遺逸尙未有金石之音至孝武太元中四廟
金石始備郊祀猶不舉樂宋文帝元嘉九年初調金
石二十四年南郊始設登歌廟舞猶闕孝武建元中
有司奏郊廟宜設備樂始爲詳定故後魏孝文太和

初司樂上書陳樂章有闕請集羣官議定廣修器數
 正立名品詔雖行之仍有殘缺隋文踐阼太常議正
 雅樂九年之後唯奏黃鐘一宮郊廟止用一調據禮文每
一代之樂二調並奏其餘聲律皆不復通高祖受隋
 禪軍國多務未遑改創樂府尚用隋氏舊文武德九
 年命太常考正雅樂貞觀二年考畢上奏蓋其事大
 故歷代不能速成今時近郊天式脩雅樂制度之間
 亦宜搏節伏準儀禮宮懸之制陳罇鐘十二架當十
 二辰之位甲丙庚壬各設編鐘一架乙丁辛癸各設
 編磬一架合為二十架樹建鼓於四隅當乾坤艮巽

之位以象二十四氣宗廟殿庭皆用此制無間異同
 漢魏晉宋齊六朝並用二十架隋氏平陳檢梁故事
 乃設三十六架國初因之不改高宗皇帝初成蓬萊
 宮充庭七十二架尋乃省之則篋虛架數太多本近
 於侈止於二十架正協禮經唐會要三十三

胡密

密乾甯中靜南軍軍事判官前守靜南縣令

唐韋君靖碑

象緯降靈河嶽孕粹必能挺生人傑卓立功名為當
 世之元勳作缺三字巨屏苟非鑒識洞達機變立微孰

能制製奇功抑揚大節不有紀述缺來我太守司空
 京兆公陶唐氏之遠裔漢丞相之後昆簪組相缺別
 國史詳備家譜具存布在簡書略不覲縷公少蘊大
 志長負缺刻鶴之工微恥雕虫之伎薄相時而動臨
 事不疑懷缺精誠蔚凌雲之氣宇語仁智卽樽里罷
 說較威猛則烏獲休扛嚮缺三若子牟之戀主從軍
 立績同馬援之征蠻滅竈得孫臏之謀投筋祕缺二
 之策揮劍卽蛟螭潛伏彎弓而猿狖啼號加以月角
 衝衡犀文貫頂視缺□□堂堂罕正覲神彩赳赳無
 雙實命世之宏材爲一時之英俊者也缺以乾符之

際天下騷然蝗旱相仍兵戈四起公覩茲遐僻人不
 聊生遂合缺義□招安戶口抑強撫弱務織勸農足
 食足兵以煞去煞泊黃巢侵陷京闕缺駕出幸成都
 四海波騰三川鼎沸韓秀昇勃亂黔峽侵軼巴渝公
 乃統缺義軍討除逆黨值秀昇盡拋舟楫圍逼郡城
 公乃詳度機宜上下攔截依缺三背水布兵兩面夾
 攻齊心剪撲賊勢大敗我武益揚渝牧田公備錄奏
 節檢校御史大夫除拜普州刺史適值川師效逆
 將臣專征缺合州絕其枝蔓恩旨加右散騎常侍除
 拜合州刺史泊鄭君缺失律廣漢山行章尙書攻圍

當川故府主太尉丞相顧公累降命缺起應公統領
精銳二萬餘人虔告蒼龜申令士卒併破二十七寨
煞口萬餘人大振威聲上聞缺檢校工部尚書當州
刺史充昌普渝合四州都指揮靜南軍使累加刑缺
書右僕射公以臨郡歲久迺思退居上表陳情缺
詔旨褒獎特許量留加金紫光祿大夫檢校左僕射
扶風縣開國缺食邑三百戶公累銜缺魚符政茂
穎川化光河內邑有倉箱之詠俗多襦袴之謠求瘼
之缺害之心尤切其於駕馭英傑取舍權豪重仁
義如丘山輕金帛如泥缺老濟弱扶危逆旅如歸

遠湊鄭莊之驛遊人若市悉登漢相之門其缺乃
如此也每遇良辰美景月夕花朝張絃管以追歡啓
盤筵而召侶缺揖讓無譁罇酒不空座客常滿王
衍之冰壺轉瑩嵇康之玉岫窳頽缺恭又如此也
至若立功立事爲國爲家或坐運玄符或親提黑槊
也缺兇徒謀必十全舉無遺策其剛毅果敢又如此
也當其賞功罰缺甄獎公勤黜弃私黨三軍感德
萬眾歸心其恩威刑賞又如缺以海濤未息雲陣
猶橫常厚駟脅左綿戴實奔衝遂府使牒呼缺然
則士馬雖精其如城柵未固思大易習坎之義徵王

公設險之缺年壬子歲春正月卜築當鎮西北維龍

巖山建永昌寨茲山也缺四郊原矗似長雲萃如斷

岸崖巘重疊磴道崎嶇一夫荷戈萬人缺二芟薙草

木相度地形人力子來畚鍤雲至連薈比屋万户干

門高缺溝洫煙籠粉堞霞捧朱樓龍吟笳角之聲雷

動鼓鼙之響而又良缺民設規築城墻二千餘間建

敵樓一百餘所遐瞻天際豈龜形之缺七能擬其上

即飛泉迸出淥沼滂流崢嶸一十二峰周缺八豈金

湯之比倫況乎糧貯十年兵屯數萬遐邇臻缺九不

闕可謂一勞永逸有備無虞公又於寨內西缺六翠

壁鑿出金仙現于手眼之威神具八十種之相好施

缺三迴祿俸以建浮圖聆鐘磬于朝昏喧讚唄於遠

近所謂歸依妙缺者焉其軍中節級將校等深達機

畧博識古今皆是公同志弟缺一心報國勦力從軍

咸奉渥恩皆霑爵賞或官崇題劔缺城或榮授金貂

或職兼霜憲雅符際會允屬休明請列署名銜庶缺

密叨依門館累戴恩光學淺文荒紀缺盡神愚智拙

錄缺美事而猶疏輒將鄙俚之詞聊述缺將欲煥乎

不朽傳之無窮遂葺斯文乃鐫貞石大唐乾甯二年

歲次缺二月癸未朔十九日辛丑記金石苑

張珪

珪唐末鄉貢進士

唐故處士江夏黃府君墓誌

并序

府君姓黃諱公俊字子彥其先□□人也卽春申君
歇之後長沙太守之裔孫高祖諱□曾祖諱恕祖諱
法皆高尚不仕府君生而有禮體質魁□□□清厚
以孝義爲心處謙恭爲首家傳清儉鄉里稱□□晉
代跨於江濱迄至今焉子子孫孫樂其耕釣可謂弓
裘不墜於地也何圖暫纓微恙便至沉□藥石繼來
畧無徵應以乾符五年十月十八日歿于義興縣善

拳鄉□塘里享年七十有六娶夫人袁氏淑性懿範
婉婉和柔雅合閨闈美哉琴瑟先於府君四年而歿
有男三人長曰約公早終次曰搏曰□□先人之風
傳先人之業遠近欽奉靡不云賢有女二人長女適
吳郡張氏其女不幸早亡愛壻張公尙存昔念□□
之□□遠及良辰次女歸于譚氏奔護喪禮罔失其
儀嗚呼□□而知命矣因夫人袁氏之□□□其吉
日□□□□□備於今日歸泉之所宜哉以□□
□年丁亥歲十月□日窀穸枕夫人塋之北庚首禮
也□寓□鄉黨請□誌難以讓陳才雖不敏聊構斯

文以紀其事刊于荆岷銘曰

大道冥口兮混然而成得之則壽兮口之則天全我

慈孝兮終口口口上士所口兮下士則笑先口有言

兮善口及嗣永介景福兮施乎後世古刻叢鈔

王延嗣

延嗣閩王審知從子不受官爵閩將亡改姓唐隱居

延平以五經教授生徒人呼唐五經宋乾德四年卒

年九十四

諫閩王王審知書

天子播遷大盜蠡起跡其所由正緣朝廷政出多門


刑賞滋濫大王親舉義兵為國平亂軋於賊臣決策

入閩士卒將佐棄鄉井墳墓從王何所圖哉志於立

功名耳今師旅暴露日久大王尙未策勳以旌戰士

而首以爵命猥及無知之私親將士解體必矣福建通志

唐文拾遺卷之三十四 榮祿大夫三品頂戴前分巡廣東高廉道加四級臣陸心源輯 崔致遠 致遠字海夫一字孤雲本新羅人年十二入唐求學 越六載為乾符二年賓貢登第調宣州溧水尉從事 淮南補都統巡官帶侍御史賜紫中和四年歸國官 翰林學士兵部侍郎充瑞書院學士卒諡文昌侯從 祀高麗文廟 賀改年號表 臣某言今月某日得進奏院狀報奉十一日宣下改



唐文拾遺卷之三十四

榮祿大夫三品頂戴前分巡廣東高廉道加四級臣陸心源輯

崔致遠

致遠字海夫一字孤雲本新羅人年十二入唐求學

越六載為乾符二年賓貢登第調宣州溧水尉從事

淮南補都統巡官帶侍御史賜紫中和四年歸國官

翰林學士兵部侍郎充瑞書院學士卒諡文昌侯從

祀高麗文廟

賀改年號表

臣某言今月某日得進奏院狀報奉十一日宣下改

廣明元年爲中和元年者展義龜城易名鳳紀美號
旣新於厯象歡聲遍振於寰區臣某誠抃誠躍頓首
頓首臣謹案王制云天子西巡狩命典禮考時月定
日同律然則三秋啟候萬乘省方金郊興肅殺之風
玉壘應巡遊之地遂遵規於舉正爰降命於改元且
大戴禮曰中也者天下之大本和也者天下之達道
致中和天地位焉萬物育焉故漢益州刺史王襄俾
蜀詞人王褒作中和樂職宣布之詩以歌君德耆舊
傳揚況及聖朝曾編新樂舉二月恬和之節播八風
調暢之音永驗休譚實諧昌運伏惟聖神聰睿仁哲

明孝皇帝陛下纂承寶位丕闡皇猷將務格苗暫勞
避狄風始行於地上易象可徵日再耀於天中休禎
斯在是以紀年有裕懸法無虧帝業中興則遠超於
前漢後漢物情允洽則近繼於元和太和足可使蠢
植昭蘇華夷悅服掩神雀黃龍之瑞應河清海宴之
期則彼蕞爾叛徒騷然嘯聚偶縱煙塵之患卽歸原
野之誅仁迴西幸之儀便舉東封之禮臣今者旣獲
成師以出必能仗義而行跡泛戈船心馳劔閣冀陳
戎捷永賀堯年臨楚水以魂飛朝天可待望秦雲而
目極捧日爲期未獲榮列朝班稱慶行在無任抃躍

戰懼屏營之至謹奉表陳賀以聞臣某誠歡誠喜頓
首頓首謹言

賀通和南蠻表

臣某言臣得進奏院狀報入南蠻通和使劉光裕等
迴雲南通和兼進獻國信金銀器物正段香藥馬等
者天威遠振星使遙歸化外癡內黠之徒竭奉贄獻
琛之禮德既超於萬古恩已洽於四夷臣某誠欣誠
抃頓首頓首伏以聖主卜征既以用和爲貴遠人從
化自知犯義不祥是得事尙從權德資含垢言皆答
響禮不違經且南蠻嘗懷異謀久稔邊患數年猾夏

獨虧控北之誠列鎮徵兵驟動征南之役則乘虛可
慮怙亂難防今者鳳口銜書纔飛遠地狼心感德永
順皇風有以見皇帝陛下法古爲君視人如子以藏
疾匿瑕爲妙策以玩兵黷武爲良箴能昭利害之鄉
不失羈縻之道遂使要服修貢寶旅歸仁適當多事
之秋已見太平之兆則彼驃信實狗封之族尙革昏
迷賊巢迺蟻聚之羣何難撲滅仁聆大捷永賀中興
必可駢堯舜而殿禹湯苑五岳而池四海盛矣美矣
念茲在茲臣頃者禦寇交州董戎蜀郡先則展馬援
討除之勢後乃設隨何說論之機仰托皇威粗申將

略喜當今日免負初心限守藩條不獲稱慶行在無
任賀聖戀恩欣躍屏營之至謹奉表陳賀以聞臣某
誠抃誠躍頓首頓首謹言

賀建王除魏博表

臣某言臣得進奏院狀報二月二十二日恩除建王
可開府儀同三司兼太保充魏博節度使者維城茂
德列土殊勞逮分閫外之憂實表寰中之慶臣某誠
歡誠喜頓首頓首臣聞周歌麟趾漢譬犬牙固須地
處親賢方得天垂寵寄伏以建王修善爲樂居高不
危好書而旣擅多才獻表而肯慙求試今以鄴稱上

鎮魏有大名將資磐石之宗遂錫分圭之寵豈獨漳
濱之俗遠荷恩威永令海內之人皆歌德業臣限守
藩鎮不獲稱慶行在無任踴躍屏營之至謹奉表陳
賀以聞臣某誠欣誠躍頓首頓首謹言

賀封公主表

臣某言臣得進奏院狀報奉去年十月十四日勅旨
皇帝第十一妹封遂甯公主長女封唐興公主次女
封永平公主待收復京闕備禮冊命者芳舒玉葉寵
襲金根鬱佳氣於高天振歡聲於率土臣某誠欣誠
抃頓首頓首伏以遂甯公主德資元吉考祥於歸妹

之古唐興公主永平公主譽治肅雍稟慶於降嬪之
典伴嫦娥於獨月分婺女於雙星秀發青春光浮碧
落伏惟皇帝陛下齊家理國恭已敬親流鳳展之殊
恩舉鸞閨之美命猶以暫勞仙蹕未復皇都留具禮
於宮闈待成功於干羽捧日而榮滋九族欽風而喜
聳踴之至謹奉表陳賀以聞臣某誠喜誠躍頓首頓
首謹言

賀殺黃巢徒伴表

臣某言臣得進奏院狀報北路軍前定難軍節度使

拓跋思恭保大軍節度使東方逵等奏宣君縣南殺
戮逆賊黃巢徒伴二萬餘人并擒三千人并賊將者
又鳳翔節度使李昌言奏探知京中賊徒潰散六月
十三日皇帝御宣政殿排仗受宰臣及百僚賀禮畢
者睿謀遠叶戎捷遄陳雉扇而儼皇威舉鸞旌而
恭列辟天浮喜氣地匝歡聲臣某誠喜誠抃頓首頓
首伏以逆賊黃巢嘯聚兇狂偷生晷刻養姦而惟日
不足恃暴而謂天可欺敢駢螻蟻之羣累拒熊羆之
眾孽唯自作罪欲何逃拓跋思恭東方逵等身居重
位手握雄師氣吞蠡彼之徒志解赫斯之怒齊駢於

六步七步果剗於左之右之戰于野而騰威戎難伏
莽拘諸原而騁勇勢若焚枯不唯剝面春喉乃得連
頭係頸况李昌言鎮於岐下伺彼京中識虞潭鷹集
之祥辯師曠烏聲之樂遂飛吉語遠達宸聰仁看大
戮之期克踐中興之運伏惟聖神聰睿仁哲明孝皇
帝陛下財成三極敦敘九疇出震位而臨人方瞻堯
日幸坤維而罪已更闡舜風暫勞遵養之師遙委仁
賢之將既誅逆黨爰列賀班濯錦江邊已睹霞舒綵
仗蒼龍闕下卽聆雷振鑿音永清四海之波遍灑九
天之澤臣謬操鈇鉞尙點鼓鞀未唱凱歌唯知抃舞

顧彭野之久妨道路怒髮雖衝望秦原而將滅煙塵
愁眉已展臣限拘守鎮不獲稱慶行在無任欣抃
踴屏營之至謹奉表陳賀以聞臣某誠歡誠躍頓首
頓首謹言

賀處斬草賊阡能表

臣某言得進奏院狀報西川都將高仁厚部領兵馬
收捉草賊阡能已於十月十八日並處置訖二十一
日聖駕出羅城北樓宣慰迴戈將士各賜優賞放歸
本營者遠耀日旗高張天網梟帥已歸於大戮鴻圖
永耀於中興臣某誠歡誠抃頓首頓首臣伏以草賊

阡能跡陷迷津心辜聖澤短狐稔射人之毒瘳狗喧
吠主之聲高仁厚逐惡志雄擒奸氣勇仰資睿略靜
剗兇徒伏惟皇帝陛下有罪必誅無思不服歌採薇
而遣卒念破竹之成功親降如綸之言遍安被練之
卒妖氛息而絳山益翠喜氣浮而錦水先春自此遠
振軍聲深摧寇黨覆頑巢而在卽迴法駕以何遙臣
方事專征先聆吉語限拘藩鎮不獲稱慶行在無任
踴躍屏營之至謹奉表陳賀以聞臣某誠歡誠喜頓
首頓首謹言

賀收復京闕表

臣某言臣得河中節度使王重榮牒報四月十日當
道與雁門節度使李克用及都監楊復光下諸都馬
軍齊入京城與賊交戰約殺卻賊步軍一萬餘人其
馬軍賊便走出城往東南路去其賊軍家口錢帛並
皆遺下黃巢亦未知存亡其逃遁賊徒尋差兵馬追
奔並已收復京闕訖者天威耀武月捷傳聲望宸階
而初奏凱歌舉區宇而咸增抃舞臣某誠喜誠躍頓
首頓首臣竊窺曩代旁採前經靜理邦家必須以殺
止殺保安社稷固在雖休勿休是故不得已而用兵
無所私而煦物伏惟皇帝陛下纂臨寶位丕闡宏圖

匝四溟而不見揚波安九野而皆能偃草而乃逆賊
黃巢暗導邪徑深入禍門久騰吠噪之聲敢恣穿窬
之便穢黷宮闕淹延歲時偷安暫戲於鼎中戮暴難
逃於机上今者風行睿略雨集王師楊復光任在信
臣李克用名爲勇將各思報効競奮驍雄齊心而覆
滅梟巢戮力而尅收鳳里賊巢拒輪不暇亂轍潛奔
干戈則電散風飛金帛則填街塞巷更展追遊之勢
必擒稔惡之徒自此日月重光煙塵永息唯望宸遊
之返駕佇觀盛禮於登封臣職忝董戎功慙徇難雖
手無重柄數年虧奮擊之能而耳得嘉聲遠地倍歡

呼之切臣限拘藩鎮不獲稱賀行在無任手舞足蹈
慶抃屏營之至謹奉表陳賀以聞臣某誠喜誠躍頓
首頓首謹言

賀殺黃巢表

臣某言臣得武甯節度使時溥狀報逆賊黃巢尙讓
分隊並在東北界於六月十五日行營都將李師悅
陳景瑜等於萊蕪縣北大滅羣寇至十七日遂被賊
將僞僕射林言梟斬黃巢首級并將徒伴降部下都
將李惟政田球等訖其黃巢函首已送行在者聖日
重耀狂氛暗銷戎捷超於古今歡聲振於夷夏臣某

誠抃誠躍頓首頓首臣伏以歲有四時則秋行肅殺
之令武有七德則兵貴禁戢之能是故歲以無相奪
而克成兵所不得已而方用自革結繩之政皆勞祝
網之仁賊巢食土懷頑含沙稔毒深犯天紀廣□地
災九州則半致侵凌三輔則久經穢黷擢髮而旣難
數罪春喉而只待懲姦今者窮寇迴心元兇授首殺
傷老少歸附居多有征無戰之言實符王道以靜待
勞之勢深叶軍機伏惟皇帝陛下運啟中興功資下
武睹天鑒而實爲大警聽風謠而非止少康永當銷
干戈之鋒便可鑄耒耜之器况迺西山八國數年飽

巡幸之恩東岳百神終日渴登封之禮仁迎雲馭俯
納巖音臣密邇寇戎撫安疆境不暇爭鋒而進實防
代俎之譏慙虧犬馬之勞喜睹鯨鯢之戮手舞足蹈
魂飛膽揚臣限守藩條不獲奔走稱賀行在無任慶
抃兢越之至謹奉表陳賀以聞臣某誠歡誠喜頓首
頓首謹言

賀降德音表

臣某言臣得進奏院狀報司天臺奏六月十六日夜
太陰虧伏奉六月二十三日德音應三川管內見禁
囚徒等宜委所在長吏五日內疎理決遣其京畿四

面暴露骸骨宜委諸鎮切准前後勅旨差人收拾埋瘞者望舒匿影曲赦流恩化洽泣辜義資掩骼振歡聲於蜀壘蕩妖氛於秦川臣某誠抃誠躍頓首頓首臣伏以日能順晷而照臨不失其所月以順時而盈缺則維其常況當葭葉初凋桂輪自減兵銷下土非石麟暗闕於東陵謫見上天致玉兔暫虧於西汜既同君子之過乃軫聖人之憂伏惟聖神聰睿仁哲明孝皇帝陛下光闡睿圖保甯區宇仁能及遠德以勝妖爰當展義之辰克舉眚災之典慈傷痍死牢囚免滯於風霜義貫幽魂道殫皆沾於雨露可使涪水耀

千年之色巴山呼萬歲之聲道能繼於垂衣法無妨於委轡佇迴巡幸仰賀登封臣限守戎藩不獲稱賀行在無任抃躍屏營之至謹奉表陳賀以聞臣某誠歡誠喜頓首頓首謹言

賀迴駕日不許進歌樂表

臣某言臣得進奏院狀報伏審勅旨迴駕日應沿路州縣切不得輒進歌樂及屠殺者聲除飾喜味減薦珍遠遵罪己之言深播好生之德凡於蠢動孰不歡呼臣某誠抃誠躍頓首頓首伏惟皇帝陛下日月運行雷雨作解體堯舜之理能咸若法禹湯之興必勃

卷三十四
十
焉退庭舞而撤宮懸惡衣服而菲飲食一慈二儉守
玄祖之格言沐雨櫛風稟太宗之不訓今則冕旒東
顧挫杼西移師乙收心無以逞鏗錡之曲庖丁斂手
何由挫鷲鯨之形義感六牲恩加萬姓則乃蜀山力
士旣無煩役之虞漢水老人豈有深譏之事帝業永
資於下武物情皆慶於中興臣方擁戎旃阻隨仙蹕
遙思盛禮空馳拱北之誠願報深恩但勵鎮南之志
無任抃躍屏營之至謹奉表陳賀以聞臣某誠歡誠
喜頓首頓首謹言
謝加太尉表

臣某言今月某日宣慰使供奉官嚴遵美至奉宣聖
旨慰諭臣及將校等并賜臣勅書手詔各一封加臣
檢校太尉依前充淮南節度使兼東面都統者仰窺
鳳詔謂對龍顏寵榮極而何力負山戰灼深而自容
無地臣某誠抃誠感頓首頓首臣伏以大司馬之威
權百官所仰上將軍之法令十道皆遵豈唯整戢五
兵實在諧和七政況當今日宜屬全材如臣者德乏
潤身智虧周物於儒則筆慙五色在武則劔敵一夫
但以荷寵天庭分憂水國擁旄重寄榮冠絕於一時
仗鉞專征冀折衝於萬里幸逢聖鑒得盡忠誠今者

已率雄師將誅巨猾征旗指路遠趨堯日之光戰艦
凌波方託舜風之力豈期王人遠降帝命俄臨獎其
外鎮之微勞授以上司之劇任未著緇衣之美旋叨
錦被之榮況乃兼制利權廣潤軍食瑞節不移於南
充兵符亦縮於東陲將何異能勝此寵寄謹當冰爲
夕飯藥作朝飧褰帷則面撫烝黎建旆則身先士卒
羣寇旣蝟毛而起偶恣倂張諸侯必馬首是瞻共成
翦滅唯力斯視何心自安必也臨亂忘身見危致命
仰解焦勞之念粗申式遏之功臣旣當下瀨屯師佇
欲中流設誓枕雕戈而輟寐跡寄轅門瞻帝座以馳

誠魂飛輦路未獲稱謝行在無任感恩戀聖榮抃戰
懼之至謹因宣慰使嚴遵美迴附表陳謝以聞臣某
誠感誠懼頓首頓首謹言

謝示南蠻通和事宜表

臣某言二月二十六日宣慰使供奉官李從孟至伏
奉勅旨入鶴拓使胄嗣王龜年閤門使劉光裕等迴
得驃信表并國信兼布燮揚奇肱與西川節度使書
皆備述情誠無不順命其表及書白并答信物數並
令錄往此事首末自卿良謀者遠降王言深窺使節
跪閱上天之旨坐知外域之心寵飾踰涯憂惶若厲

臣某誠抃誠躍頓首頓首臣才非間代智不濟時但以每鎮窮邊粗安荒服免使飽飛飢附欲令前倨後恭頃者忝守成都冀申遠略遂憑釋子善諭蒙王仰稟天威得揚風教永戢干戈之患俾陳玉帛之儀雖羣議沸騰竟銜鑠金之口而宸衷剗斷早推匪石之心是以暫事西巡或虞南叛爰遣維城貴胄直閣近臣迴聖德以降尊遠傳玄化譯訛言而獻欵備寫眞誠既令抱義戴仁果見奉琛執贄此皆陛下威德臣何力之有焉而迺謂臣有先見之能知未來之事設和蠻之良策備幸蜀之嚴城俯錄勤勞迴垂稱獎睹

雕題之章奏書軌既同息猾夏之猜嫌梯航相接驗南睎之贖咎知北極之紆憂雖云五利有餘敢希茂賞唯願四方無事永贊昌期臣限守藩條不獲稱謝行在無任欣躍感戴兢惕之至謹因供奉官李從孟迴附表陳謝以聞臣某誠惶誠恐頓首頓首謹言

謝立西川築城碑表

臣某言伏奉十一月六日勅旨以臣在任西川節度使日創築羅城昨因有勅嘉獎方進所賜碑詞今已付所司鑄寫建立者一片石文龜初戴立九重天語鳳已銜來雕銘莫繼於色絲寵飾遠超於華袞仰窺

恩獎俯抱憂惶臣某誠感誠懼頓首頓首頓首者幸夢
三刀久臨益部遙提一劔得挫蒙兵但以其玉壘可
稱金城未設山口則空吞蠻蠻水頭則斜枕犍犍含
溪抱谷之形雖云天險比屋連薨之勢實類野居臣
是以運度籌謀斟量板築蓋從人欲果致子來遂得
役興而草偃川中誠感而土生石上長圍於三十六
里高鎮於百千萬年不愧鐵名可將錐試隼墉烏堞
儼若騫飛錦浪緜峯迥然裝飾遂蒙陛下辱褒稱之
重許刊勒之榮以爲事實可觀足得詞華不朽臣雖
遇泥封激賞豈將油素矜誇非敢彰謙所期避謗今

者伏遇皇帝陛下遠巡勝槩親覽微功徵舊賜之碑
詞命新鐫之筆跡永使卓立琴臺之境平欺劔閣之
銘且杜元凱之岷亭無非自衒阮德規之齊國蓋是
眾成謾傳身後之虛名豈睹目前之盛事曷若彩毫
見獎翠琬斯刊因成下土之功終應上天之意得逢
今日別振孤風向非陛下錄善恩深酬勞德厚則何
以未有出師之業篆刻叨榮曾無興學之規傳揚竊
美臣限拘鎮守不獲稱謝行在無任感戴欣躍戰懼
之至謹奉表陳謝以聞臣某誠惶誠恐頓首頓首謹
言

謝賜御製眞贊表

臣某言二月二十六日宣慰使供奉官李從孟至伏奉勅旨已令於大慈寺御眞院寫朕眞并扈從宰臣等眞列卿儀貌俱會此堂今先寄卿眞軸并朕親製贊述賜卿冀表顯恩式彰異禮者銀璫降使玉簡傳詞受宣而頂踵光輝拜賜而神魂驚越臣某誠感誠懼頓首頓首臣志欽涓訣業鍊圯書敢憑涓滴之勞自安寵寄願掃氛霧之患永竭忠誠遂在先朝便從戎役南征北伐豈暇甯居東鎮西藩累叨重任遇陛下龍飛之後委微臣隼擊之能蜀國防蠻則粗申遠

略楚宮捍寇則偶遂良機旋令移節於海門復許建牙於淮甸是以常拘戎闔未覲宸階唯披天上之詔書似睹日中之王宇空增戀闕莫遂歸期頃者虔託仁祠寫留麼質豈致去思於舊鎮唯慙取笑於空門伏遇陛下展義陳詩停鑾駐蹕遂徵繪事俾寫聖容其於侍從之臣宜居左右豈料孱微之質得潤丹青愧無鸞頷之姿永侍龍顏之側况蒙宸襟顧矚御筆贊揚高題而素壁爭輝卓立而浮埃不染然後遠飛寵詔特遣貴臣仁捧綵牋驟竊游揚之譽初開寶軸深驚刻畫之恩窺看而形影自慙感激而肺腸何極

昔漢朝中興聖帝下念功臣列形像於禁宮載動名
於史筆雖令贊述不自稱揚豈如陛下暫事巡遊迥
垂獎飾別降絲綸之命親編錦繡之詞俾臣位掛於
鳳凰池中名超於麒麟閣上遐尋故實獨荷殊榮有
何出眾之能見此非常之寵所謂千年嘉遇萬代美
譚唯當志勵風霜永驗松筠之不改身霑雨露免憂
蒲柳之先衰臣限守藩條不獲稱謝行在無任感恩
戀聖榮躍兢懼之至謹因供奉官李從孟迴附表陳
謝以聞臣某誠惶誠恐頓首頓首謹言

謝御札衣襟并國信表

臣某言二月二十六日宣慰使李從孟至伏蒙聖恩
別賜臣御札衣襟并御服衫一領龍腦香一金合金
銀花散椀一口金花銀盃一隻香口窺神筆恩襲御
衣仙香氣撲於鼻根寶器光騰於眼界仰霑寵錫俯
積憂兢臣某誠感誠懼頓首頓首臣每念業紹弓裘
任叨斧鉞誓傾忠節終報聖朝去年親率驍雄願殲
克醜旋承綸音已駐舟師旣慙叩機之言徒切枕戈
之望豈期貂冠傳命龍袞裁書辱宣尼一字之褒過
光武十行之詔加以粉分御筭香滿雕奩花鐫乃麗
水之珍雪口透任山之器捧玩而竇驚寮吏緘藏而

永耀子孫雖有幸逢時輝榮驟集而無功受賞愧恥
難居徒荷鴻私何申豹略身依楚水未陳告捷之書
目斷蜀天但灑感恩之淚臣限守藩鎮不獲稱謝行
在無任荷戴激切榮抃兢懼之至謹因供奉官李從
孟迴附表陳謝以聞臣某誠惶誠恐頓首頓首謹言
謝加侍中表

臣某言臣伏奉去年十一月十一日恩制加授臣侍
中依前淮南節度使階勳封並如故仍加食實封一
百戶者有命自天處身無地感深以泣寵極而驚臣
誠抃誠懼頓首頓首伏以黜陟分科聖君至教行藏

守道達士良規慮受爵以斯亡在持盈而不殆臣自
提權筦便遇兵戈郡邑爲征戰之場山海足逋逃之
藪旣難聚利莫遂成功況乃權有他門刃無餘地動
見越庖代俎無非避柱觸楹遂虧漕輓之程僅壞銅
鹽之法伏蒙皇帝陛下俯詳直道不寘嚴誅選用良
才改移重務而乃察臣在公之節念臣戀主之誠重
委將壇更增封邑恕乏一時之秀許攀七葉之榮唯
慮慙卿或譏竊位然臣今所以自賀者三朝獨立七
鎮榮遷每當拜爵王庭不省謝恩私室以茲勵已永
免愧人謹當激發壯圖殲夷窮寇粗息四方之患仰

寬萬乘之憂臣限守藩條不獲稱謝行在感恩戰灼
屏營之至謹奉表陳謝以聞臣某誠慙誠懼頓首頓
首謹言

謝加侍中兼實封表

臣某言六月十六日供奉官劉叔齊至奉宣聖旨慰
諭臣及將校并賜臣勅書手詔各一封官告一通就
加臣侍中仍加食實封一百戶餘如故者自天降命
無地安身啟鳳詔而魂驚對貂冠而股慄臣某誠感
誠懼頓首頓首臣早因薄效每忝殊榮勤王而素乏
實勤受爵而但多虛受負山寡力臨谷戒心況自戎

馬生郊陣蛇出穴妖氛蔽闕法駕省方臣久鎮雄藩
嘗提重柄一無成績兩拜寵章前者以上將軍爲大
司馬今則兼納言之任加眞食之榮累年虧橫草之
功終日抱伐檀之恥且易曰或錫鞶帶終朝三褫之
詩云受爵不讓至於已斯亡遍覽格言是懲貪祿不
能報國苟欲榮家臣實何心有覩于目但遇王人遠
降聖澤傍流仰賻綸音深嘉稅政以爲師徒輯睦黎
庶安甯俯念忠誠特行懋賞臣也方寸之地可倚咫
尺之顏不違豈敢矯俗陳情飾詞讓爵難效一辭而
退唯期三命益恭旣除勞力於利權終願勵心於闔

寄臣伏限守藩不獲奔赴行在稱謝無任感恩戀聖
戰汗屏營之至謹附供奉官劉叔齊奉表陳謝以聞
臣某誠惶誠戀頓首頓首謹言

請巡幸江淮表

臣某言伏以舜伐有苗修德而終能率服湯征自葛
行恩而競望來蘇斯皆今古之美譚實乃帝王之盛
事固敢踟天負責向日裁誠仰陳利害之端冀副華
夷之望不量狂瞽遠黷聖聰臣某誠惶誠懼頓首頓
首臣聞日月以運行為德永麗于天江河以委輸是
期必朝于海上能昭其煦育下方遂於通流況乃天

灾非人力能除地分有兵戎不起將獻永安之兆輒
陳可復之詞伏自寇陷上京兵徵外鎮猛銳始從於
鶴列旋致徒歸頭克尚固於蟻封難成盡殪臣豈唯
投袂實至衝冠昨率舟師暫屯江次必欲朝離楚岸
暮及漢濱旗張商嶺之風劍拂秦川之霧願言薄伐
冀效微勞尋蒙陛下遠許分憂不令離任臣進退惟
命始終無虧甯招曠職之譏敢涉爭功之責又緣淮
海乍息烟塵忽若去兵必當致寇則迺江南沃壤盡
成蠶食之資淮北強鄰暗展鯨吞之勢輿賦既無所
倚軍須將必屢空是以仰奉勅書已班師旅四境之

赤眉歸伏八州之黔首謐甯遍布皇恩粗申將略然而關中縱敵閩外偷安既乖踴躍以身先每切忸怩於顏厚伏惟皇帝陛下省方展義駐蹕經時龜城壯麗之形金湯雖固鳳輦巡遊之費桂玉可虞況舊謂西川富强祇因北路商旅託其茶利贍彼軍儲今則諸道發表章則半載始迴徵貢獻則經年未達實緣道路遼賈兼值干戈阻躡值剽掠者斯多至行朝者甚少加以僦雇所費耗蠹不輕每當水運陸般只可率鍾致石以此征稅則漸成抗弊軍兵則未遂飫饒伏慮扈從實繁宴犒仍廣盡搜資於三蜀難濟用於

百司苟興盱食之憂實慊庶寮之望又以蜀川僻居邛棘□人密邇蠻戎虺毒潛吹獸心難測儻或乘虛犯境率眾渡瀘六軍之熊豹騰威縱能制敵八詔之豺狼作暴不免喧驚事可酌於將來禍須防於未兆伏惟陛下覽臣忠懇察臣直言暫迴西幸之儀更舉南巡之禮使處處息後予之怨人人安戀主之心天下幸甚天下幸甚且如遠狩河陽僞遊雲夢將興霸王俯順權宜況江淮爲富庶之鄉吳楚乃繁華之地陛下九年理國四海爲家豈比周之東遷非擬晉之南渡賊巢克狂久聚穢蹟難除縱便收城未宜迴駕

豈如楊都粵壤桂苑名區四夷之賓易朝天九牧之貢無虛月伏乞陛下俯迴鳳展略泛龍舟必想山靈卷三峽之風水伯寢九江之浪遐尋禹跡允叶堯巡昔也日耀錦川天不傾於西北今則風行澤國地無缺於東南然後發使清宮舉章司隸振盛儀於歸闕告休績於登封臣雖識昧變通而志勤匡濟敢憑草奏輒貢管窺無任戀聖感恩戰越屏營之至謹奉表陳請以聞臣某誠惶誠懼頓首頓首謹言

第二表

臣某言聞聖人能以天下爲一家以中國爲一人者

必闡於其義達於其患然後能爲之臣遂自前年繼陳短識請移車駕巡幸江淮計資於避險就安事叶於暫勞永樂未迴聖鑒再獻瞽言臣某誠慙誠懼頓首頓首臣尙阻擒奸敢言伐善然但願愚夫之一得難追賢者之三思臣頃鎮成都偶諧遠慮克符天意亟就土功別營雉堞之雄規永壯龜城之峻境爰憑釋子善誘蒙王果俊偏強之愆便付懷柔之信皆資帝力能肅物心伏遇陛下遠耀珠旗高臨玉壘樂降絲綸之旨深嘉毫髮之勞謂臣有先見之機念臣以至誠所感仰銜睿獎倍激忠誠然則當年已往之功

粗成籌畫今日未來之事竊有管窺苟或緘辭則爲負德不辭鼎鑊輒貢芻蕘臣近者俯察時情仰瞻乾象荊州道路羣寇將侵蜀國封疆微灾似起儻或未收鳳闕尙駐鑿輿忽有妖氛潛興近境必恐烏合蠶食之徒占據江陵把斷峽路則列鎮貢賦無計流通行在詔書亦難傳降若見東西阻絕固當遐邇動搖伏惟陛下斷自宸衷斥其橫議念江淮之進獻遠涉多虞察蠻蠻之奸克乘虛可懼早移仙蹕直幸楊都滅星辰交錯之灾叶日月運行之理則乃九州斧鉞討戎而齊願風馭四海梯航奉贄而必能雲集盛矣

美矣念茲在茲且逆賊黃巢久躡皇居多成穢跡直到虎收之後須勞繕葺之功更俟二三年之間可興千萬世之業慮不先定事難速成伏乞陛下覽竭節之言闡隨時之義俯從衷懇暫事宸遊天下幸甚天下幸甚臣粗識古今略詳利害自非激以爲智豈敢知而不言謹奉表陳請以聞臣某誠惶誠懼頓首頓首謹言



唐文拾遺卷之三十五

榮祿大夫三品頂戴前分巡廣東高廉道加四級臣陸心源輯
崔致遠二

讓官請致仕表

臣某言臣伏以聖君御宇必先塞彼佞門良士省躬
唯慮妨其賢路苟速官謗是辜主恩况臣關中無定
難之勳闡外乏分憂之效強欲晏安寵祿其如玷浼
刑章永言量力而行固在奉身以退既知無隱寧避
有辭臣某誠慙誠懼頓首頓首臣少勵琢磨晚師擒
縱不以一經介意粗於三略留心願紹家勳免虧堂

構先皇帝念臣孤直試以諸難出分大將之威權坐
受上卿之爵秩故得內稟聿修之訓外伸式遏之能
北掃虜庭則胡雛不敢南牧南清獠海則蠻謀無由
北窺及覲形墀暫司緹騎俄屬齊郊聚孽鉅野興師
臣也不才謬膺斯任伏遇皇帝陛下纂臨宸極警諭
戎藩舉旌鉞以分勞聽鼓鼙而軫念謂臣有戢兵之
奇略察臣立降寇之微勞遂令位假中台名編外相
夢想既通於鳳沼威稜益峻於龍旌其後瀘水波驚
蜀山霧暗久念雕題之患遍流黔首之災又蒙命臣
曰俞爲帥於彼爰遵薄伐得解倒懸豈敢貪天之功

願銘鍾鼎祇能因地之利別建溝隍伏蒙陛下俯獎
忠誠特行懋賞開國授周司徒之貴立家紹漢丞相
之榮臣此時早誠持盈輒思請老必願告休錦里退
隱羅浮不料壠上耕夫盡解揭竿斬木草間惡子競
謀蟻聚蜂飛當荆門失守之時乃楚塞宿兵之際忝
趨戎旆兼縮牢盆僂俛而未能報恩駢馳而何敢言
病或猥猥磨牙於原野或鯨鯢噴毒於江湖尋提招
討之權求撫旬吳之俗遠憑睿略深挫羣寇洎解印
海門建牙淮甸上將軍之劇任首冠列藩大司馬之
雄資先沾宥禮揣頂踵而偏濡雨露扼咽喉而莫效

涓埃且自黃寇憑陵翠華巡狩仰天戮力竊嘗服王
導之言終日痛心何止洒袁安之淚及至成軍已出
又緣奉詔卻迴行藏雖順於綸詞進退實慙於物論
遂見時溥興北林戎役周寶致南鄰責言玉每慮於
俱焚金亦憂於眾鑠幸蒙陛下涵之以海量炤之以
天光如見肺腸得保首領然臣也先軫以直言逞志
曹植以深過責躬則二年忝都統之名不能誅奸戮
暴四載主銅鹽之務不能富國贍軍是以兵權則屢
見改移利柄則變爲分割凡此辱君之命莫非職臣
之由臣猶自知況在陛下擢髮而旣難數罪乞骸而

唯願辭榮今者大憝奔逃上京克復氛祲卽當殄滅
寰區永見廓清臣有忝登壇無能報國行當擘齒居
亦胡顏兼以頃鎮蠻陬久棲瘴嶺蒙犯其妖烟毒霧
剗除其封豕長蛇當年而靡憚勤劬晚歲而皆成疾
疹不將筋力爲禮旣載前經苟或身心自憊難逃後
患雖思強飯實愧素餐廣陵爲楚澤上游醴府乃漢
朝大任以臣衰老當此重難必恐終無所成遂希不
可則止伏惟皇帝陛下知人爲哲多士以甯選英才
而代處是邦俾微臣而退居散地鬪於菟之逃富固
是忠貞王內史之辭官誠非矯飾幸遇舜風無外漢

日再中陛下既已除肝食之憂微臣亦希免夜行不
息臣無任望恩戀聖懇迫兢灼之至謹奉表陳請以
聞臣某誠感誠懼頓首頓首謹言

謝詔狀

右臣伏奉四月十日詔旨黃巢克逆穢黷宮城罪惡
貫盈人神共怒尋東兵合勢翦滅元兇想副朕懷已
遵道路佇聞克復永耀功名者十行天語萬里星飛
捧窺而壯膽初驚跪讀而愁眉頓豁竊以黃巢禍心
斯極根力既衰肉已太醜果□將落蹙起烟塵之患
則歸原野之誅臣每當永夜枕戈早願中流叩楫自

啟行十乘已屯駐五旬伏緣江路多虞風波未便暫
淹行色用候良時非致役於遷延但興懷於矍鑠今
則仰觀鳳銜之詔況乘隼擊之秋俯勵軍謀仰遵睿
算卽冀朝離江北暮到漢南長駟背水之師永破滔
天之孽率奮義感恩之眾氣已凌雲殄藏奸匿暴之
徒勢如沃雪伏惟陛下歲巡備禮時邁傳歌將示罪
於三危乃宣威於七德臣遠承獎諭誓盡勤勞身暫
寄於戈舩心每馳於劔閣唯願西都獻捷早申收復
之微功東嶽告成得覩登封之盛事臣無任感激兢
懼之至謹奉狀陳謝以聞謹奏

謝詔示權令鄭相充都統狀

右臣伏奉去年九月九日詔旨卿曾間道獻章諸鎮
 飛檄便欲長駢甲馬親議專征未即便來須權制置
 遂命鄭畋等分爲京城四面都指揮諸道師徒慮卿
 偶未委知故茲詔示者伏以書曰無偏無黨王化乃
 興詩云不識不知帝謀是稟況兵當伐叛事合從權
 臣去年先因淮北侵疆後值江南阻路久屯師旅未
 遂戰征陛下妙選羣才近分重寄鄭畋等莫不身先
 貔武手運豹韜既當怒髮爭衝固謂賊育可堪仰酬
 睿獎竟勵忠誠臣也遠鎮臨戎強隣結憾唯慙曠職

豈望成功伏蒙陛下尙念勤勞曲垂慰諭觀上天之
 慈意解外地之憂深既許將軍獨舉柳營之令終期
 叛卒必歸竹町之誅臣限守戎藩不獲稱謝行在無
 任感激戰懼之至謹奉狀陳謝以聞謹奏

謝宣慰狀

右宣慰使供奉官李從孟至伏奉去年九月九日勅
 書手詔兼宣恩旨慰諭臣及將士等者伏以感恩效
 命武士常規仗順摧兇元戎素分賊巢偶乘奸便尙
 道嚴誅臣願膾彼逆鱗嚙其邪膽掃重氛於魏闕迎
 法駕於蜀都是以前據馬援之鞍敢矜獨勇杖辛

毗之鉞親率諸軍久在江干再承天旨不令離任遂已班師豈料伏蒙陛下念及老臣撫茲眾卒特遣星使遠降泥封綸傳萬乘之言纖微不聞續彼百夫之體慰暖皆均歡呼而聲已振雷感泣而淚將成雨唯期勵節共願報恩臣限守藩條不獲稱謝行在臣無任感戴榮抃戰懼之至謹因供奉官李從孟迴奉狀陳謝以聞謹奏

謝詔獎飾進奉狀

進奏院遞到恩賜手詔一封

右臣伏奉詔旨以臣先□供軍應接使駱潛等進奉

銀事特賜獎飾者伏以收功示賞乃聖主之異恩寓物輸誠固藩臣之常事但屬敵滋鄰境寇阻道途運綱而既闕先登贄禮而僅侔錫貢早成□滯況涉艱微是以雖憑屏水之珍難追塗山之罪豈料鴻毛比價方申懇悃之心鳳口銜書遠降褒稱之旨感激而懷榮爲懼揣修而報德何期臣限守藩條不獲稱謝行在無任荷恩戀聖屏營之至謹奉狀陳謝以聞謹奏

謝詔示徐州事宜狀

右臣先奉詔旨據時溥奏卿本道羗兵侵境殺傷令

務止遏者臣遂具時溥誣謗事由申奏伏奉二月二十五日詔旨今則寇孽不日勦除藩方務息爭競所宜和叶各保封疆者臣伏以天德既高側管者固難窺測日恩至廣戴盆者自阻照臨是以遠竭愚誠動違聖慮時溥既銜睿獎得縱兵威早成熊據之謀更展鯨吞之勢累興師旅來犯封疆焚郭邑於山陽掠資財於淮上臣遂令捍禦略挫兇狂而乃時溥奸計已成根株巧言頗有枝葉不思已過敢惑宸聰今者再奉絲綸仰遵徽纆唯期寬則得眾粗可和而不同臣分闕無功戢兵爲務至於草寇猶許歸降況是鄰

藩豈謀侵擾彼無此詐此無彼虞臣限拘鎮守不獲稱謝行在無任感激屏營之至謹奉狀陳謝以聞謹奏

謝詔止行墨勅狀

右臣伏奉詔旨去春權降詔命許諸道承制除官已兩度降勅止絕自今後凡有要甄獎者並於急遞奏聞不得更議承制者臣伏以漢朝鄧禹始啟倖門魏室曹瞞敢專重柄欲敦於自家刑國所惜者唯器與名伏遇陛下遠事宸遊慮防爵賞遂降無私之澤遍資諸道之權不料人人而競弄筆端處處而皆誇墨

勅長蛇封豕猶匿暴於神州狗尾羊頭已成羣於列
鎮臣前年雖奉詔旨未欲施行卻緣親率軍兵遠期
征討此時久屯南浦將泛西江忽被鎮海節度使周
寶欲惑軍情潛施巧計便以無功將吏悉皆超授官
榮臣所領士卒既多將校不少彼安坐者猶爲甄獎
此遠行者豈免怨嗟遞口聲傳從頭憤激臣若不依
周寶必恐事生遂准詔書得行軍賞已曾一一具事
由申奏訖自奉前年十一月一日勅旨仰遵成命靜
守常規至於近日所招賊徒只與往時先賜官告曾
無僭越豈可隱藏今者外將忠誠永當無二大君善

教已至再三泣告而天何未聆憂懷而地謂可入臣
限拘藩鎮不獲稱謝行在無任戰越屏營之至謹奉
狀陳謝以聞謹奏

謝邠公甫充監軍手詔狀

伏奉某月日勅書手詔各一封

右新授當道監軍邠公甫四月十日到伏蒙聖恩賜
臣勅書手詔兼慰喻臣及將校等九天降詔萬里宣
恩柳營之列將歡呼桂苑之羣寮感泣伏以邠公甫
素懷材略久撫軍戎漢南之職業可觀江北之物情
獲賴既見寬能得眾必令師克在和臣仰窺五色之

書俯慰三行之士喜氣高侵於畏日歡聲遠振於薰
風臣與將校等無任感恩激切榮并屏營之至謹奉
狀陳謝以聞謹奏

謝除鍾傳充江西觀察使狀

右臣先奏請授鍾傳江西觀察使其高茂卿乞別除
廉鎮伏奉七月五日詔旨允許特賜獎飾者天從素
望風遞仙音既諧舉善之誠實叶分憂之寄伏以鍾
傳比從屬郡來援府城撫綏而使洽眾情禦備而能
成遠略高茂卿既多梗阻不免徊翔固難掉鞅而旋
豈許垂橐而入臣以戒之在鬪事可從權遂具奏論

輒陳利害不料一言之善遽得動天終令二將之才
皆榮列土鍾陵江徼銅柱海隅政成而必有可觀恩
重而各得其所臣限拘鎮守不獲稱謝行在無任感
激兢灼之至謹奉狀陳謝以聞謹奏

謝就加侍中兼實封狀

右臣得進奏院狀報伏奉某月日恩制加授臣侍中
餘並如故仍加食實封一百戶者九重降命萬里傳
聲側聆而踴躍忘疲內揣而怔忡失措伏以納言進
秩頒邑賞功固須德望鎮時仍有勳勞濟物然後方
可謂君無虛授臣無虛受如臣者謬提旄鉞免墜弓

卷三十五
九
裘空有志於四方竟無能於一割況自羣克蝟結戰陣蛇奔狂鱗久戲於鼎中聖駕遠巡於劍外臣也動不能剗烟塵之患靜不能瞻山海之資遂蒙改易兵權分張權課雖值盤根錯節其如有斧無柯安邦之計策何成富國之機謀莫就唯甘黜爵以警慢官豈期陛下恩洽無偏義深宥過特超眾例許陟高資印標石鵲之祥早慙不次冠聳金貂之飾愈覺非宜況叨真食之榮實愧素餐之咎但屬狼星未滅鯨浪猶翻方期抗旆以專征不敢懸車而請老謹當訓兵是務殄寇爲期粗申武弁之威仰報彤門之賞臣限守

藩鎮不獲稱謝行在無任感恩戀聖戰汗屏營之至
謹奉狀陳謝以聞謹奏

謝秦彥等正授刺史狀

新授和州刺史秦彥 新授滁州刺史許勅

右件官臣先奏請各授管內刺史今月某日得進奏院狀報伏奉某月日勅旨允許者九天降寵兩地分榮觀降將之懷恩喜元戎之獲請伏以秦彥等比者爲梟爲獍維虺維蛇久流螫蠹之災未有誅鋤之便臣偶令招諭旋自歸投遂假分符皆能守節誠宜獎勸輒具奏論今者聖澤濡枯皇風盪垢纔擲黃巾之

飾許登阜蓋之資秦彥等既荷新恩永除舊惡必也
出榮建隼入效懸魚學其守土之規贖彼滔天之罪
臣限拘藩鎮不獲稱謝行在無任抃戴兢灼之至謹
奉狀陳謝以聞謹奏

奏請從事官狀

營田判官將仕郎殿中侍御史內供奉賜緋

魚袋宋絢

右件官相門傳慶詞苑成名退居安東郭之貧就養
奉南陔之詠自參戎幕備見良籌佐理而星霜屢遷
清勤而風雨不改久禪重任敢覬殊榮伏請轉官改

章服依前充職

攝鹽鐵巡官朝議郎守京兆府咸陽縣尉柱

國高彥休

右前件官訓稟儒宗才兼吏術王畿結綬早見勤勞
賓席曳裾頗多婉畫望憲臺之清秩助推筦之重權
伏請轉官依前充職 以前件狀如前伏以臣子之
所以立身者以孝以忠慎終如始若遂榮親之望必
勤事主之誠且如擇隣卜居斷織勵學至于成立色
養無虧能報慈母之恩則朱絢有焉又如教以義方
退而學禮至干仕宦力行有規能遵嚴父之訓則彥

休有焉臣是以久籍謨猷仍嘉德行事堪勵俗志切薦賢伏惟皇帝陛下恩流域中孝理天下特迴睿獎許假賓口冀令修已從知盡以敬親務本干黷宸扆無任兢惶謹錄奏聞伏聽勅旨

奏請僧宏鼎充管內僧正狀

右件僧跡洗四流心拘八政演法於有緣之眾致功於無口之言伏自翠華遠省於風謠丹詔屢徵於月捷寬渠未減銳旅猶勤宏鼎常令僧三十人晝夜轉念功德張開覺道教化闔城所願早覆梟巢便迴鸞駕雖不關於至理實自發於精誠兼緣當道屬郡既

多仁祠不少若無綱領難肅緇流伏乞聖慈俯詳所請許充當道管內僧正仍賜紫衣所冀身掛金襴逞養鷹之雋氣手持玉柄制醉象之狂徒謹錄奏聞伏聽勅旨

謝許宏鼎充僧正狀

右件僧臣先具狀申奏請充當道管內僧正仍賜紫衣伏奉勅旨依允者伏以宏鼎久勤轉念輒具薦論能資十地之因遠荷九天之寵元戎獲請喜三教之並行法侶歡呼驚一佛之或出唯冀永持功德上報慈悲苟不能盪火宅之餘災則何以稱水田之華服

必可潛燃慧炬助滅妖氛臣限守藩條不獲陳謝行
在無任感戴兢灼之至謹奉狀陳謝以聞謹奏

謝除姪瓊官狀

前守京兆府鄠縣尉高瓊

右件官是臣姪男今得進奏院狀報伏蒙勅旨除授
彭州九隴縣令仍賜緋魚袋者伏以高瓊早乏藝能
忝從祿仕佐理未閑於吏道列官已陟於王畿昨者
背秦嶺而脫烟塵面蜀川而就雲日雖有心於葵藿
且無托於萍蓬豈料不由薦論便賜超擢繼拋黃綬
遽沾墨綬之榮始佩銅章又竊銀章之貴況乃濛陽

屬邑益部名區正當巡幸之邦實謂來蘇之地豈伊
殘劣能此勝當臣也必令行愼履冰坐勤飲水勉追
芳於花縣無致辱於竹林臣限守戎藩不獲稱謝天
庭無任感恩戰懼之至謹奉狀陳謝以聞謹奏

謝弟祝再除緜州刺史狀

緜州刺史高祝

右件官是臣堂弟今得進奏院狀報奉某月某日恩
制除授金吾將軍被軍州官眾狀舉留續准勅旨依
前授緜州刺史者恩資鳳展喜集鶴原形影光輝精
魂震越伏以高祝早從裙履免墜箕裘既懸報主之

誠得習牧人之術昨者忝膺寵寄粗舉政條銀水金山曾無自潤帶牛佩犢或有可觀振家聲廉慎之名致郡俗舉留之請況乃秩假帝之喉舌官登王之爪牙仕宦旣榮分憂又重視也必遵勸勵更慎撫綏不辜署劔之恩以謝擁轅之眾臣亦申教誨俾贖貪叨俱在朝之盛儀雖慙前哲各爲郡之清譽可畏後生共資綽綽之詩冀播優優之政臣限拘藩鎮不獲稱謝行在無任感恩抃躍之至謹奉狀陳謝謹奏

謝姪男宏約改名濟除授揚州大都府左司馬
狀

朝散大夫前行潤州上元縣令柱國高弘約
右件官是臣姪男先具奏請除授揚州司馬并請改名濟伏奉勅旨依允者九天渥澤萬里塗程沐恩命於堯階泛光輝於阮巷負山旣重臨谷何安臣以高濟早列官裳頗聞吏術建業字人之政曾有微功惟揚典午之資敢希薄授始陳丹請驟竊殊榮濟也譽雖讓於王晞名不慙於程昱聖君如父照臨實表於無偏猶子比兒訓勵必遵於匪懈俾申勤效少贖貪叨臣限守藩條不獲稱謝行在無任感恩激切兢灼之至謹奉狀陳謝以聞謹奏

奏請姪男劬轉官狀

前鄂州都團練副使朝議郎檢校祠部郎中
兼侍御史柱國賜緋魚袋高劬

右件官是臣親姪男粗詳吏術早忝官裳始佐理於
江陽旋從知於寒壤實得片言以折獄未嘗枉道而
事人遂荷寵榮已登班列尋叨命服久倅廉車方當
寇盜喧驚亦有籌謀施展加以每遵家法願報國恩
宗族稱孝悌之名僚友許溫恭之行臣是以輒思內
舉敢具上陳引以進之守戴禮之深義惟善所舉憑
魯書之美譚伏乞聖慈俯鑑忠懇特賜除授峽內刺

史劬也必能勵心從政常銘馬援之言竭力分憂不
負謝安之舉干黷宸扆無任兢惶謹錄奏聞伏聽勅
旨

奏薦歸順軍孫端狀

歸順軍都知兵馬使銀青光祿大夫檢校國
子祭酒兼左武衛將軍御史中丞上柱國孫
端

右件官巢鳥知風園葵向日能投善教永戢姦圖既
梭抗斧之心可在執殳之列仰希甄獎輒具奏論伏
乞聖慈特授一官勒在軍前驅使冀率感恩之眾永

除稔惡之徒謹錄奏聞伏聽勅旨

奏李楷已下參軍縣尉等狀

以前件狀如前伏以臣當府淮海奧區州縣多事永
言屬吏實籍得人每憂興賦闕懸漸難責辦若俟銓
衡注擬恐失舉賢前件官等皆爲君子儒有古人志
學優則仕旣知祿在其中見善若驚不愧藝成而下
可以參臣軍事可以代臣邑僚試假缺員頗彰殊效
況抱斑衣之樂冀攀黃綬之榮伏乞聖慈允臣所請
干冒宸鑒無任兢惶謹錄奏聞伏聽勅旨

奏楊行敏知廬州軍州事狀

右臣伏以武士所先惟忠與勇忠勇兼著行敏有之
自假郡符能勤□理銳旅有爭先之志齊毗無背怨
之詞蓋乃訓練齊戎撫綏周室在於巡屬實越輩流
累具奏論請賜正授伏慮道塗艱阻未達宸聰每籍
幹能再陳薦舉永言成績可使頒條伏乞聖慈特賜
允許干黷宸鑒無任兢惶謹錄奏聞伏聽勅旨

奏誘降成令瓌狀

草賊黃巢下擘隊賊將成令瓌徒伴四萬人
馬軍七千騎

右件賊徒元受黃巢指使占據潼關尋自擘隊奔逃

所在燒劫就中斬黃管內最甚傷殘臣伏以肅齊王者之師必期無戰遵奉聖君之德可恕有瑕暫緩討除先加告諭臣昨者專差押衙丁威賁委曲深入招誘果願歸降兼乞委任郡符展效忠節其成令瓌臣當時補充軍前押衙兼給功名檢校國子祭酒兼御史中丞官告一通權知楚州軍州事以今月二十三日部領手下兵士到楚州倒戈訖伏緣楚州與徐州漣水對岸今春曾被寇戎驟來攻劫雖頻討逐未盡誅擒況漣水賊徒久蓄姦謀潛行偵謀常排戰艦欺視孤城再欲奔衝終爲患害臣以此特將此郡權授

令瓌既能投信義而來必得破頑克之窟臣久臨戎事素習軍謀以爲先則惠而後則誅兵家所貴遠者懷而近者悅帝道方興上窺含垢之恩下察慕羶之志不勞寸刃唯假尺書成令瓌遂革野心能從天意叛徒四萬盡爲樂業之齊人精騎七千皆作輸忠之烈士旣當恕罪倍見感恩蜂飛之小寇旋銷蝟結之元克可殄斯乃陛下祝除三網舞耀兩階信旣洽於豚魚化能移於梟獍善師不陣敢矜止殺之權至道無私但仰好生之德其成令瓌下願在軍門及放散人數請續具申奏謹錄奏聞謹奏

奏招降福建道草賊狀

福建道溪洞草賊何疇張延鄂瓌悚等徒伴
共八萬人

右件賊徒自去年冬侵劫信州界內臣以其道途阻
闕溪洞險艱若欲討除恐爲勞役遂於今年二月內
差節度衙推諸葛成充東面招諭使判官便賚委曲
職牒招誘其賊首何疇等三人雖行匪有師而卜能
從吉一時應響三窟除姦纔當言下歸投兼乞軍前
展效臣□□委曲補職名追赴軍前俾申忠節臣伏
以小人興叛所迷者貪競之心上帝垂恩所惡者殺

傷之事終能耀德固可弭兵與其繼獻捷書曷若盡
收降款是以遠飛折簡便倒羣戈塵不假於曳柴風
自行於偃草溪頭洞口免汚烟霞閩嶺鄱江豁通道
路況乃各期後效盡願前驅能令八萬餘人永不二
三其意有以見陛下皇威天覆玄德日新四郊之烟
壘將銷萬國之梯航競集則乃軍中士卒安身而永
別戰場宇內生靈攜手而齊登壽域臣無任歌詠屏
營之至其何疇等下補職名願隨臣征行及放散人
數請續具申奏謹錄奏聞謹奏

奏姪男劭華州失守請行軍令狀

具銜高劾

右臣伏以饋軍之將禮所興譏大義滅親傳曾垂訓
將肅安危之本必嚴賞罰之科竊自巨猾增驕王師
致討臣堂姪男劼比在河中司錄得受李□都指揮
領昭義之甲兵收華州之城邑稍申鷹犬之力暫挫
梟狼之聲已蒙特降殊恩俯旌微效服榮金紫位忝
星郎始離蒲坂之具寮遽假蓮峯之通守誠合率忠
勵勇馘醜摧兇稟進尺退寸之規決萬死一生之計
終申誠節仰報寵光昨者狂孽併來疲兵再戰旣絕
安西之救難申逐北之威然而不能潤草塗原永忘

苟活抑使靡旗亂轍旋見脫歸致諸道之星分縱姦
徒之霧結職此之過罪無所逃豈可當二峰保守之
時遽沾寵賞及一陣奔亡之後得免誅夷國有常刑
軍無貸法懲一勸百念茲在茲伏乞聖恩特行嚴典
徇于藩鎮警彼師徒所冀國章永能安於社稷微臣
家法亦不昧於神祇干冒宸聰無任責躬泣血戰越
之至謹奉狀陳請以聞謹奏

奏請天征軍任從海等衣糧狀

天征軍都將任從海及節級軍將并官健總
二百八十七人

右臣得都將任從海及節級狀稱自赴征行已逾五載累曾沿海襲賊上江防虞去年軍都放迴本道從海等且在當府願隨行營者各得家信知四川已停衣糧伏緣從海等皆是貧寒更無營業彼處父母親屬便須委壑填溝請具奏論乞還衣糧者謹按史記釋云天子車駕所至則人臣爲僥幸賜人爵有級數或賜田租之半故因謂之幸也伏以任從海等萬里從戎五年于役不辭艱險願盡勤勞今者身在東吳職居西蜀此方苦於羈旅彼已停其衣糧遠路音書難寫征人之恨貧家親戚先懷餓殍之憂伏遇陛下

暫幸龜城未迴龍闕三川草木別有光榮萬戶烝黎永能蘇息而任從海等久離本鎮不睹殊恩望雨露之均沾恨烟波之迥隔固堪傷憫輒具奏論伏乞聖慈允臣所請特令本道卻給全糧所冀鳳駕巡遊士卒皆知其有幸鴻慈煦育君親必表於無私謹具錄奏聞伏聽勅旨

表間光聖傳言
 卒皆賦其命幸無蘇期有保謀必克外通及聖
 慈亦引風而舒命本飲浴命全歸下歸其聖
 文汗所射於斯之風歸國其心歸國其心歸國
 永懷精意而升發其聖人歸本歸本歸本歸本
 善如雖未歸國歸國歸國歸國歸國歸國歸國

